

GRAD
PL
6058.9
.C27
1914
BUHR

"KAMI NAMAN"

(1915)

AN NG DANGAL

NOBELANG

TAGALOG

IKATLONG

AKLAT

NG

AKLATAN

NG

"KAMI NAMAN"

UNANG

PAGKALIMBAG



FAUSTA CORTES

Isa sa Lupon ng mga Manunulat ng

"Kami Naman"

AKLATAN NG
"KAMI NAMAN"
1045, DAANG ANAK
'G BAYAN (DATING
EMATORIO), PAKO
MAYNILA



AKLATAN NG "KAMI NAMAN"
AGAWAN NG DAÑGAL
KASAYSAYANG TAGALOG

KATHA NI

FAUSTA CORTES

*Naging Pañgalawáng Pang-ulo ng "Liga de
Mujeres Filipinas"; Kinatawán sa Unang
Kapuluṅgang Manggagawa at Taga-
Ingat-yaman ng "Magdamayán
At Nang Matanghál".*

IKATLONG AKLAT NG AKLATAN NG
"KAMI NAMAN"



AKLATAN NG
"KAMI NAMAN"
1045, DAANG DART, PAKO,
MAYNILA, K. P.
1914

Grad
PL
6058.9
C27
1914
Buhr

SA TUTUNGHAY

KAPATID: iKay laking pagkabigó mo! Oo, nabigo ka; sapagka't kaya mo binili at babasahin itong AGAWAN NĜ DANĜAL, ay sa paniniwala mong ito ay kagaya nĝ mĝa nabasa mo nang akda, na pangwang mahahalaga at matatamis. Samantalang ang AGAWAN NĜ DANĜAL ay dahóp na dahóp sa palamuti ó hiyas na iyán. Salat sa matatamis na pananagalog. Dukha sa matatayog na isipan. Kapós sa mararangal na turo. Paano'y ako sa Lupon nĝ mĝa Manunulat nĝ "KAMI NAMAN", ay isang baguhan sa larangan nĝ panulat. Lakas-loob lamang ang umakay at nagbunsod sa akin. Gayón ma'y naniniwala akóng pakikinabangan mo upang gawing aliwan. At huwag nawang kumupas ang kapuripuri mong pagmamahal sa wikang tagalog.

ANG KUMATHA.

GRAJ
30991323
SEAS
8-15-00

PATALASTAS

Ang AGAWÁN ÑG DAÑGAL ay siyáng ikát-lóng aklat ñg Aklatan ñg "**Kamí Namán**" na pinalabás ñg Lupon ñg mga Manunulat. Una ang "*Tagumpay ñg Apí*" ni Bb. Pascuala Pintor at ikalawá ang "*Tuntunin ñg Pulong*" ni G. Rosendo S. Cruz.

Ang AGAWÁN ÑG DAÑGÁL ay ipinagbibilí sa lahat ñg bilihan ñg aklat dito sa Maynila, sa halagáng dalawang piseta (₱0.40) ang bawa't salin.

Ang AGAWÁN ÑG DAÑGÁL ay mababasa rin ñg mga na sa lalawigan, kung magpapadalá ñg halagáng isáng salapi (₱0.50) kay Bb. Carmen de la Rosa sa Aklatan ñg "**Kamí Namán**", 1045, daang Dart, Pako, Maynila, K. P.

Ang AGAWÁN ÑG DAÑGÁL ay mapapakyáw sa Aklatan ñg "**Kamí Namán**" at nagbabawas ñg malakí sa halagá.

Ang AGAWÁN ÑG DAÑGÁL ay aring tunay ñg kumatha.

Ang AGAWÁN ÑG DAÑGÁL ay gaya rín ñg lahat ñg sinulat ñg mga tagá "**Kamí Namán**", na maaaring bilhín sa pamamagitan ñg liham. Sumulat at ilakip ang halaga ñg aklat at gugol sa selyo sa nasabi ñg Aklatan ñg "**Kamí Namán**", at walang salang di nila tatanggapín sa pagbalík ñg korreo. Dapat ipadalá ang kalatas kay Bb. Carmen de la Rosa, ang Pañgulo ñg Lupon ñg mga Manunulat ñg "**Kamí Namán**".

AKLATAN NG “KAMI NAMAN”

1045, DAANG DART, PAKO, MAYNILA, K. P.

LUPON NG MGA MANUNULAT

/MGA KATHANG LUMABAS NA

UNANG AKLAT

TAGUMPAY NG API

Katha ni Bb. Pascuala Pintor, Pangulo ng Lupon ng mga Bituin ng “Kami Naman” at pangatlo sa mga babaing pilipina na sumulat ng nobela. Ang kathang ito ay larawan ng mga pusong kulang ng pagtatapat.

IKALAWANG AKLAT

TUNTUNIN NG PULONG

Sinulat ni G. Rosendo S. Cruz, Pangulo ng Pamahalaan ng “Kami Naman.” Isang ganap na patakaran ng maayos na pagpupulong. Halaw sa bantog na “Robert’s Rules of Orders”.

IKATLONG AKDA

AGAWAN NG DANGAL

Akda ni Bb. Fausta Cortes, isa sa mga Bituin ng “Kami Naman” at pangapat sa mga babaing pilipina na lumikha ng kasaysayang tagalog. Ang akda ay matatarok sa pagbasa ng aklat na itó.

PANGUNANG HAKA

NI

G. ROSENDO S. CRUZ

Hiniling n̄ pinagpipitaganang kong Bb. Fausta Cortés, kumatha n̄ aklat na ito, na ako ang siyang magbigay n̄ pang-unang salita dito sa kaniyang akdang AGAWAN N̄ DANGAL. Pagkapalibhasa'y naging ugali ko na ang di marunong sumuay sa m̄ga ganitong pit-haya, lubha pa't ang humihiling ay isang gaya ni Bb. Fausta Cortés na di marapat pagkaitan, kaya mahirap man sakali sa akin ang tumungkol sa ganitong bagay ay tutupad ako at tahasang ilalahad ang aking m̄ga kuro-kuro.

May ilan nang taong lumipas n̄gayon na ang suliranin n̄ *feminismo* dito sa ating bayan ay napagtalunan hanggang sa m̄ga pahayagan. Pinagkuro kong matamán ang m̄ga katwirang pinanghawakan n̄ m̄ga sangayon at di sangayon, hanggang sa ang naging wakás ay napanig ang aking paniniwala sa salungat.

Parang pagsurot sa aking pagpanig sa mġa di sangayon sa *feminismo* ay walang kaabogabog ay sumipot naman ang mġa kilalang kapisanan nġ mġa babae na ang mġa pamagat ay "Liga de Mujeres Filipinas" at "Ang Babae Nġayon". Ang mġa kapisanang ito, na pawang itinataguyod nġ mġa babae ay nagpakita nġ kanikanilang kasiglahan at kapuri-puring kabayanihan. Nang mapagmalas ko ang ganitong kilusan nġ mġa babae ay unti-unting nahahapay ang aking pananalig sa di pagsangayon sa kababaihan. Unti-unting nawala ang aking pag-aakalang ang mġa babae ay dapat lamang maging reina, nġ mġa tahanan, bulaklak na humahalimuyak sa isang halamanan.

Hindi nġa lamang ito ang siyang nakapaghawi sa tabing nġ mali kong akala, kundi nġ matunghayan ko ang mġa ilang aklat na katha nġ mġa babae na ang mġa ito ay ang "Sawing Pagasa" ni Bb. Francisca Laurel, ang "Nang Bata pa Kami" nġ Bb. Pura L. Medrano, at ang "Tagumpay nġ Api" ni Bb. Pascuala Pintor. Ang pagsipot nġ mġa nasabing aklat ay siyang lubusan na nagpagupo sa aking pananampalataya na ang mġa babae ay batbat lamang nġ hiwaga, palamuti nġ isang tahanan, at aliwan sa magusot na buhay na ito. Nġayon ako nanalig na ang mġa babae ay hindi nġa lamang pala isang kasang-

kapan sa loob n̄g ating m̄ga tahanan, ni bulaklak na samyuan n̄g bangō, kun di ang m̄ga babae n̄ga pala ay isang tunay ding lakás, isang bahagi n̄g lahi na may karapatan at kakayahang makatulong n̄g pagpapaanyo n̄g isang bayan, n̄g isang lahi, at n̄g sangkatauhan.

Dapat alisin ang piring n̄g ating m̄ga mata at ititig diyan, sa m̄ga babaeng may m̄ga ginintuang pagkukuro. Dapat hangaan ang kanilang katalinuhan at kailan man ay di nararapat ipalagay n̄g kahi't sino na ang babae ay alangan sa pagkukuro n̄g isang lalaki.

¿May alinlangan pa kayo?

Naririto ang isa pang matibay na saksi n̄g aking m̄ga pangungusap. Basahin ninyo ang kathang AGAWAN NG DANGAL na bunga n̄g isipan n̄g isa ding babae na si Bb. Fausta Cortés at pagkatapus ay dilidilihin ninyo ang m̄ga nasasaysay, tutupin ang inyong dibdib at sabay na tanungin ang inyong sarile kung tunay n̄gang ang ganitong panulat ay dapat hangaan at sampalatayanan.

Ang aklat na ito ay isang matibay pa n̄gang saksi (aking inuulit) n̄g katalinuhan n̄g m̄ga babae, lalo't higit ang sa kaniya'y kumatha. Dumadaliri ang aklat na ito sa maling kinahimalingan n̄g ilan na pagmamaimbot n̄g sandat at imbing karanġalan, pagwawalang bahala na sa lahat, mangyari na ang ano mang mangyayari makaagaw lamang at mag-

VIII

tagumpay ang pagiimbot ng dangal. Anopá't ang aklat na ito ay nararapat maging salaming malinaw ng mga masasama at mabubuting kalooban. Ang suliranin idinudulot ng aklat na ito ay na sa babasa ang kaibigan, alalaon bagay, kung ang mangbabasa ay walang takot na maging ganid at matapang ang loob na maging asal Kain ay pupulutin niya ang mga pakana ng may masamang asal na nalalarawan sa aklat na ito. Nguni't kung ikaw na mangbabasa ay kapatid ni Mabuting asal at anak ni Malinis na budhi ay pupulutin mo naman ang mga bagay na kapuripuring tinungkol ng ulirán ng magagandang asal.

Dapat ngang hangaan ang panulat at pagkukuro ng babaing may katha ng aklat na ito. Ang isang kabaro ni Eva na may ganitong katalinuhan ay katanngi-tanngi. Ito'y talagang taglay ng kabihasan.

¡Sulong kayo kababaihan! Ngayon ay panahon ng pagkilos. Pagbibigti ang pagwawalang kibo at pagpapakaimbi ang paghahalukipkip.

ROSENDO S. CRUZ.

Agosto 2, 1914.

SA MGA BITUIN NG "KAMI NAMAN"

Makikislap na Bituin:

Lahat ng búhay ay nagtatapos sa mapanglaw na kamatayan. Lahat naman ng Samahan ay nagwawakas sa masaklap na paghihiwalay. Ang lakad na ito ng kalikasan ay talagang di na babago ngayon at sa haharapin. Ngunit ang sanla ng pagaalaala, sagisag ng pagmamahal, ay di kumukupas kailan man. Bagkus lalong nagiibayo habang tumatagal, ang tingkad at uri ng katuturan. Paano'y walang pagmamahal na napariwara.

Ang kalakhan ng aking pananalig, na walang pagaalaalang nasawi, ay siyang nagutos sa akin, ng paghahandog ko ng maralitang akdang ito, sa inyong kapitapitang mga bakás; saksi ng aking pagmamahal. Inihahandog ko sa inyong mga yapak, hindi upang kayo ay aralan, kung hindi upang aliwin ang inyong mga pusong laging nangangarap ng biyayang dulot ng pagibig.

At sino ako sa harap ng makikislap na «Bituin»?

!Ako!

!Ako ang mangangaral?

¡Ni sa panaginip ay hindi mangyayari!

Kailangang masaulo ko ang dunong ng sangkatauhan; kailangang matarok ko ang lihim ng sangkalanngitan; kailangang ako ay maging araw muna, bago ako lumuklok sa matayog na karangalang guro ng mga «Bituin».... At sapagka't hindi mangyayari ang ginto kong guniguni, ay manulos na lamang tayo, sa ang AGAWANG NG DANGAL ay inihahandog ko sa inyo, tanda pang minsan ng aking pagmamahal.


Inihahandog ko rin namán sa inyo, upang kung kayo ay umaawit na ng bagong búhay, ay magunita man lamang, na kayo ay naging «Bituin» ng «Kami Naman», suló na tumanglaw sa landás na binagtasán ng masisikap na kawal ng kilusan ng mararalita. At mapagukulan nawa ninyo ng dukha mang alaala ang mga nasawi sa pagsisigasig na itanghal ang bayang mahirap. Sa gayon ay mabibilang tayo sa boong sangsinukob na humahanga at nagdadangal sa mga pinagpala dahil lamang sa pagsisikap na buhayin ang naghihingngalong pagkakapatiran...

¡Maging dapat nawa sa inyong kadakilaan!...

Nakikipagkakapatiran,

FAUSTA CORTES.

Pako, 5 ng Mayo ng 1914.



AGAWÁN
ÑG
DANGÁL



*“Pagpipilitan naming
bakahin ang lalong ma-
samang sakit ng tao: ang
AGAWÁN NĜ DANĜÁL,
sakit na nagbabagsak ng
mga banal na layon at
dakilang pangarap; sa-
kit na lalong mabisa sa
pagpatay sa naghihing-
ngalong pagkakapatiran
at pipilitin naming sa
ibabaw ng sakit na iyan,
ay magluningning ang
tagumpáy ng wastong
ugali, ang paggalang at
pagibig ng tao sa tao...”*

*—Mga pangunusap ni
G. Angel de los Reyes,
Pangulo ng “Kami Na-
man,” sa talumpating bi-
nigkás nitó sa pagtatang-
hál ng Samahán, noóng
iká 26 ng Oktubre, 1912.*



I

MGA PUSONG NAMANDAW NG KAPWA PUSO

A NG kapanglawang naghari ng gabing yaon sa isang nayon ng Pako ay binulahaw ng pagtapat ng ilang pusong namamandaw ng kapwa puso. Noon ay isa sa mga gabi ng Enefo; gabing napakalungkot, palibhasa'y mangilangngilang bituin lamang na nagbabansag ng kadakilaan ng Diyos, ang nagaantilaw sa nagtatampong langit. Ang buwan noon ay nagmaramot ng kanyang liwanag, at aywan kung saang sulok ng kalawakan nagkubli ang kaibigan ng gabi. Samantalang ang mga kuliglig at panggabing ibon ay umaawit ng tagumpay, ang mga bulaklak naman ay ipinagpapalalo ang

kanilang bangô, alindog, at halimuyak. Nguni't, sa lahat nġ ito ay namamaibabaw ang tinig nġ mġa kalulwang idindaing ang pagirog, gayong ang bahay na tinatapatan ay waring libingang lahat ay natatahimik.

Natapos ang pangbungad na tugtog. Isinunod naman ang isang *magandang gabi pong* kundiman. At dito'y tinawagan na ang dalagang pinipintuho. Sa pamamagitan nġ malalambing na tinig, ay naunawa nġ lahat nġ doroon, na si Dolores pala ang dinadaingan.

Pagkatapos nġ kundimang yaon, ay siya nang pagbubukas nġ langit. Ang lapat na durungawan nġ bahay na tahimik ay nabuklat. Isang diwata nġ bagong panahon, isang bituing mayaman sa ganda, ay siyang tumanglaw sa mġa pusong mapagpuyat; nagsabog nġ liwanag at tuwa.

—Magandang gabi po!—ang magalang na bati nġ lahat nġ na sa lupa.

—Magandang gabi po naman!—ang magiliw na tumbas nġ binibini—Tuloy kayo!.. ituloy!...

Ang bahay na may kaliitan ay nagsikip sa labing-tatlong kalulwang umakyat sa langit.

Ilang sandali lamang ang nakaraan at namayani na naman ang bigwela, biyolin, bandurya at plauta. Ang kaniláng tunog na tagapagtaboy nṅ hapis, ay minsan pang nagtanghal nṅ gilás.

Sa isang dako naman nṅ harapang yaon, ang magandang si Dolores, ay nagsasabog nṅ kanyang yaman: nṅ dilag at hinhin. Ang maayos na tabas nṅ mukha ay napapatungṅan nṅ maiitim na buhok. Ang mapupulang pisnṅi ay tumatapat sa matingkad na itim nṅ kilay. Malalagong pilik-mata ang nagaalaga sa maamong malas. Isang katatagang tangṅos nṅ ilong ang nagmamalaki sa madugong mṅa labi. At nagiinamang mṅa nṅipin ang bakod nṅ katamtamang bibig na binubukalan nṅ inagigiliw na pananalita.

Samantalang anṅ mṅa kaharap ay isinasaloob ang pagpapasarap sa kanilang tugtugin, si Dolores naman ay isinasabog ang kanyang mṅa sulyap at titig. Inisaisang lihim na minasdan ang mṅa binatang yaon. Ang puso niya'y sisikdosikdo; parang giniginaw na nilalagnat. Alangṅang magmalaki at alangṅang mangimi.

Sa isang dako naman, ay payapang

nakikinig ang isang ginoo. Matabang sa mukha ay nababasa ang kagulangán na. Siya ay si kapitang Andoy na ama ni Dolores; ang kilala sa pangalang Alejandro Balderrama. Siya ay isa sa mga kinaaalangalanganan sa daang yaon ng Sagat. Baga man lipas na ay kapitan pa rin ang tawag sa kanya. Sa tabi nito ay mulhang napopoot, nakasimanġot, at maasim na maasim ang mukha, ng kapitana Martina, ang ali ni Dolores. Marahil ay dahil sa pagkabulahaw sa kanyang tulog. Liban sa tatlong ito, kay Dolores, sa kanyang ama, at sa kanyang ali, lahat na ng dooron ay kabilang na ng mga namamandaw ng puso.

«Loleng nalulungkot ako!...» ang manay siyang bungad na kundiman noong binatang tagaawit. Isang malumbay na tugtog ang isinaliw naman ng bigwela. Si Dolores ay napalingon sa di kinukusa at naabala tuloy na magpasigarilyo. Ang puso niya'y lalong nilagnat, at pinawisan siya ng malamig. Irap naman ang itinugon ni kapitana Martina. At matapos ang magiliw na awit sa «...ay, Loleng ng buhay ko!...»

—Aling Loleng—ang saad ng isang ma.

kisig na binatang kanina pa, ay mapupuna na, na siya ang may patapat—ipinakilala ko sa inyo ang aking kaibigan—at iniharap ang binatang umawit.

—Bagong lingkod mo po;—ang sambot ng ipinakilala.—Artemyo de la Pas.

—Salamat po;—ang magiliw na tugon ng dalaga—gayon din po naman: Dolores Balderrama.

At sila'y nagkamayan, hanggang sa naipakilala ang lahat. Habang si kapitana Martina, ay lalong nagniningas ang poot, si Beteng naman, ang binatang may paharana, ay parang nagmamalaki sa kanyang mga kaibigan. Bawa't makasiping ay binulunang ng «¿Bagay na ba sa akin?» Lihim na tatawa at panakaw na tititig sa masayang mukha ni Dolores. Hindi mapalagáy ang binata. Sa lahat ay masasayang ngiti ang iniuukol. Palipatlipat ng upo, at sa labing-dalawang kasama ay siyá ang lalong masigla at nagtatalík sa galák.

Ang katahimikan ay ginambala na naman ng tugtugan. Parang sinasadyang binibiro ang pagkaasim ng mukha ng kapitana Martina. Nguni't ihimala yata at biglang nagbago ang kunot na noo, noong

madinig na muli ang panambitan ni Artemyo! Masayang nakiumpok at sinipingan ang kanyang ipinagmamalaking si Dolores.

“Ay Loleng! ay Loleng!....
ako'y mamamatay....
kung hahabagin mo
ang daing nĝ buhay...”

Iyan ang simula nĝ mapanglaw na pagdaing, balot nĝ taos na hinagpis, at sa tinig na waring nalulunod sa hirap.

Sa kalagitnaan, ay nagpahalata nĝ panibugho; panibugho na bunga nĝ pagmamahal; at pagmamahal na likha nĝ pag-irog. Anya'y:

Kung tumititig ka
sa ibang binata,
ang buhay ko Loleng
ay papanaw yata...

Lalong sinasal nĝ pagtibok ang puso ni Dolores. Waring kinikiliti naman si kapitana Martina. Gayong nakanĝiti nĝ galak ang inaantok na kapitang Andoy. Patuloy naman sa pagsasalooob nĝ tugtog yaong labing-tatlong panauhin.

Napalaot n̄ napalaot yaong si Artemyo sa pagawit. Halos tinig na lamang niya ang nagdidiwang sa loob n̄ bahay. Dahil sa sarap n̄ kundiman, kung minsan ay itirik ang mata sa ilaw na nakabitin. Nguni't lalong marami ang lihim na sulyap niya kay Dolores, ang nahuhuli ni matandang Martina.

“Sa paglalaro mo
n̄ m̄ga bulaklak
gunitain lamang
ang aba kong palad...”

Iyan ang patuloy n̄ binatang Artemyo sa kanyang pamamaibabaw. Sinasamantala naman itó ni Beteng upang kaulayawin ang kanyang pinopoon.

—Aling Loleng,—ang wika—talaga pong sa kaibigan kong iyan ay ipinagkakatiwala ko ang aking boong buhay...

—Gayon pala!—ang sambot ni Dolores —na ipinagkatiwala na ninyo sa kanya ang boong buhay ninyo, ay ibakit pa kayo sumama rito?

—Ba!—ang tutol ni Beteng ang ibig kong sabihin ay ipinagkakatiwala kong siya na ang dumaing n̄ hirap ko...

—Sapagka't ang damdamin nġ puso ni Pedro ay maidadaing nġ bibíġ ni Huwan...

—Napopoot ba kayo?—ang maamong tanong ni Beteng na nakahalatang totoong mailap si Dolores. Napuna niyang ang mġa tugon sa kanya ay nasasaputan nġ suliranin.

—Bakit ako mapopoot?—ang pakli nġ dalaga—sa ang katotohana'y ariin mang biro; ay ipinagtatapat kong walang itatagal ang aking puso sa kanyang panambitan....

“Di ka na naawa
sa aking pagdaing;
buhay nġ buhay ko
ligaya at aliw...”

Ang waring pakikihalobilo nġ kundi-man na ikinauntol nġ pagsasalaysay ni Dolores. Sandali silang nanahimik, bago nagsalita si Beteng nġ:

—Diyata't wala kayong itatagal sa kanyang panambitan?

—Kung wariin ko—ang salo nġ dalaga.

—Sa gayo'y namamanaag na ang aking tagumpay!

—At bakit po?

—Di ba sinabi ninyong nahahabag ang puso ninyo sa kanyang panambitan?

—Opo.

—Di nababagbag na ang loob ninyo sa akin? Sapagka't ang daing ni Artemyo ay siyang daing ko...

—Gayon po ba?

—Sinabi ko na pong ipinagkakatiwala ko sa kanya ang boong buhay ko.

—Ah, imali kayo! Iba si Artemyo kay Beteng! Ang daing ni Artemyo ay buhat sa kanyang puso kaya ang pagkahabag doon, ay pagkahabag sa kanyang pagkatao.....

—Nagbibiro yata kayo!

—Hindi. At bakit ko kayo bibiruin?

—Aling Loleng!

--Talagang totoo: ang puso ko'y nababagbag sa kanyang panambitan. iKay tamis niyang umawit! iKay sarap dumaing!

—Aling Loleng! Nilulunod ninyo ako!...

Hindi sumagot ang dalaga nguni't ang malas ang pinapagsalita. Tinitigan si Beteng ng titig na makahulugan. Aywan kung bakit kinuha nito ang kanyang sombrero at matuling umalis. Nilisan ang kanyang mga kaibigan at kasama ng walang pasintabi. Sa kata-

misan nġ kundiman ni Artemyo ay di naman siya napuna. Liban kay Dolores, ang mahinhin si Loleng, ay walang nakaino. Ito lamang ang nakatatarok na si Beteng ay yumaong may taglay na poot at banta. May poot sapagka't nabigla siya sa mġa tugon ni Dolores. At may banta sapagka't nalalamanġan siya ni Artemyo. Anaki'y isáng bayang nilubugán nġ araw ang dibdib niyáng binabayó nġ pagnġingitnġit.

“Titigil na naman
ako sa pagdaing,
na nagaantabay
nġ awa mo Loleng...”

Diyan natapos ang malungkot nġuni't magiliw na kundiman, na dinaluhan nġ nakakikiliting taginting nġ bigwela at biyolin.

Hindi napigilan ni kapitana Martina ang kanyang palakpak; datapwa't si kapitang Andoy ay tinalo na tuloy nġ antok.

—Salamat po—ang magiliw na sabi nġ ating dalaga, bago pinagukulan si Artemyo nġ—iKay buti pala ninyong umawit!....

—Baka kung ano na po iyan?—ang may hiyang pakli ng binatang pinuri.

Ang usisaang “inahan si Beteng?” ay siyang pumigil sa dalaga upang tugunin ang binata. Isa’t isa’y nagtanungan. Sa tanong ay tanong din ang itinutumbas. Kaya’t nagdiwang ang alingasngas at lahat, liban kay Dolores at sa nakakatulog na kapitang Andoy, ay pinagharian ng pagtataka.

—Marahil ay may sumundo—ang saad ni kapitana Martina.

—Magpaalam na tayo—ang lihim namang anyaya ng may hawak ng bigwela sa kanyang katabi.

—Siya nga—ang ayon naman nito.

—Tayo na—ang ulit ng isa.

—Gabi na tayo—ang patuloy ng iba.

At lahat ay pinatahimik na naman ng tagingting ng tuwa. Tumugtog sila ng isang pangwakas. Si Artemyo noon ay napatabi.

—Aalis na ba kayo?—ang tanong ni Dolores sa mapalad na binata.

—Opo,—ang tugon nito—sapagka’t toong mababagabag kayo.

—Wala po kayong aalalahanin.

—Salamat po.

—Kayo pala'y kinatawan ni mang Beteng—ang may nġiting salaysay nġ dalaga.

—Siya pong totoo.

—Di ang inawit ninyo'y parang inawit nila?

—Gayon nġa po.

—At ang panambitan ninyo ay panambitan nila?

—Yaon po ang dapat.

—Nagkasala ako!—ang waring hinampo nġ dakilang babai—boong akala ko'y lahat nġ inyong inawit ay bukal sa inyong puso, mula sa ubod nġ inyong buhay!...

Kinabahan si Artemyo nġ marinig ito. Ang puso niya'y di mapalagay. Parang binabayo ang kanyang dibdib. Sampung paghinġa ay nanġangapos. ¡Kaawaawang kalulwá sa gina nġ kagipitan! At ang boóng pagkatao niya'y dagling sumuko sa gayóng dilág. Subali't ang kapalaran ay itinapat siya sa landas na dapat tun-tunin. At anya'y:

—Ikaw po ang masusunod: maiyuukol mo saan man ibigin, at di malilihis ang iyong akala...

Hindi tumugon ang dalaga at sinamantala ni Artemyo:

—Aling Loleng, kung batid mo lamang ang itinitibok ng aking loob, ang iniluluha ng aking puso, ay sasabihin mong ako'y sinunġaling...

—At hindi ba kayo sinunġaling?—ang dugtong ng dalaga--¿Di ba kasinunġalingan ang maglahad ng wala sa loob?

—Wala sa loób!

—Kayo na rin po ang nagsabi.

—Yaon po'y lambing lamang ng pusong nagtataglay ng hiya... Isang pakunwari ng pagibig na nagaalanġan sa dakila mong ganda...

—Nagaalanġan?

—Opo, aling Loleng, at baka di maging dapat na maglingkod sa inyo...

Tinotoo na ni Artemyo ang pangunġumpisal. Nilimot na niya ang kanyang tungkulin. Hindi na naaalaalang siya ay kasangkapan ni Beteng. Wala na sa gunitang siya ay bibig lamang ng kanyang kaibigan.

Si Dolores, ang mabining dalaga na sumuko ang puso sa mġa pagawit ni Artemyo, ay parang nagayuma. Sa kanyang mukha at pangunġusap ay nalalarawan ang paggiliw na nabihag ng mapalad na binata.

Sa pagtititigan nĠ dalawang kalulwa ay natapos ang pangwakas na tugtog. Ang mġa namamandaw nĠ puso ay nagtayan na. Isa't isang nagpaalam at nakipagkamay sa bunying binibini. Ang pagkakataon ay di sinayang ni Artemyo. Siya ang nagpahuli sa lahat. Kinamayan niya nĠ boong higpit si Dolores at dinamdám namán nito ang katuturan noon. Mġa titig nila ang nagpalitan nĠ damdamin nĠ kanilang dibdib.

Doon natapos ang masayang gabi.





II

HINDI NAPAFASTONG PAGTITIYAP

DOON sa kabilang dulo ng daang Sagat, sa hanay din ng inuuwian ng mapanghalinang si Dolores, ay dalawang lalaki yaong ipinagtatanong si Beteng. Sa isang magandang tahanan, doon sila pumanhik, sapagka't yaon ang itinuro sa kanila ng napagsanggunian.

—Mga kaibigan—ang buhat sa itaas ay kanilang narinig—tuloy kayo, tuloy kayo....

—Magandang araw po, mang Beteng—ang bati naman ng daawa.

Sila'y pumanhik at ginanap ang karniwang kumustahan. Matapos ilapat ni Beteng ang pinto ay nagsaad ng ganito:

—Malaking suliranin ang gumugulo sa isip ko, kaya inabala ko kayong ipina-

tawag. Sa inyong pangangailangan ay nalalaan naman ako.

—Salamat po—ang salo ni Pastor na isá sa mga panauhin.

—Sapagka't kayo'y inaári kong mga kapatid ay sa inyo ko dapat ipagtapat.

—Ipatuloy mo po—ang pakli ni Simón, na kasama ni Pastor.

—Malaon nang ang puso ko'y pina-pagdudusa ni Dolores—ang patuloy ni Beteng—nguni't ikay pait ng nasasapit ko!... iPawang tiwali! At kagabi lamang ay hinarana namin, nguni't gaya rin ng dati, ay pawang paglibak sa akin ang aking napala...

—Bakit po?—ang tanong ni Pastor.

—Di ba kayo pinaakyat?—ang usisa ni Simón.

—Pinatuloy kami, dili ang hindi—ang patlang ni Beteng—nguni't ang pagkapatuloy sa amin, ay siyang lalong nagbansag ng kaapihan ko. Opo, kaapihan, pagka't sukat bang itanóng sa akin ni Dolores na kung bakit pa raw ako sumama roon....

—Yaon po'y ugali na ng dalaga: lahat ng nais nilang sabihin ay dinadaan sa hinampo—ang putol ni Simón.

—Hindi kaibigan,—ang tutol ni Beteng—pagka't malaon n̄g kumukulili sa tain̄ga ko, na si Artemyong aking pinakikiusapang siyang umawit sa aming pagtapat doon, ay siya daw ang napupusuan n̄g babaing yaon, gayong ito ay wala namang pagibig sa kanya.

—Ganyan din po ang balita ko—ang pag-ayon ni Pastor—n̄guni't, kailan ma'y di ako naniwala.

—Sino po bang Artemyo yaon?—ang pagsisiyasat ni Simón.

—Ang kalihim sa Samahang “Kumilos Tayo”—ang tugon ni Pastor—yaon bang nagtalumpati sa inyong nayon noong ipagdiwang si Rizal. May magandang pangangatawan at....

—Yaon pala—ang salo ni Simón—Kakilala ko po yaon at ako man ay kasapi rin sa “Kumilos Tayo.” ¿Diyata't siya ang naiibigan? ¿Si Artemyo? ¿Ang artista? Aywan ko rin...—at tinapos sa iling at n̄giti ang kanyang pagkamangha; iling na nagpapahayag n̄g pagpapawalang saysay kay Artemyo, at n̄giti na nagtanghal n̄g paglibak sa pagkatao noon.

Ang dalawang kaharap ay napatigil. Nabasa nila sa mukha ni Simón na siya

ay may natatarok na lilim ni Artemyo. At di pinalagpas ni Beteng. Sinamantalá ang pagkakataón.

—Bakit po?—ang simula—¿may nalalaman ba kayong alimuom ni Artemyo?

—Sus!—ang buntong hininga ni Simón—iSi Artemyo! ¿At bakit hindi ko malalaman ang kanyang lihim? Siya ay isang konduktor sa trambiya noong araw na dahil sa nahuli sa pagumit ay pinalayas tuloy ng empresa. Isang taong nagpagalagala sa pagbibilang ng bato, na kung kanikanino nangungutang ng makakain. Napasok na artista, at ang manakanakang pagtayo sa entablado ay siyang ipinagmamalaki ngayon. Gayong ang tinig ay tinig kanduli at kung umawit ay parang bumabasa ng Pasyon....

—Ha! ha! ha!—ang tawa ni Beteng.

—Aywan ko—ang tanggi ni Pastor—sa akin ay mabuting kaibigan si Artemyo.

—Mabuti kung mayroon—ang salo ni Simón—nguni't kung wala ay masama.

—Marahil nga—ang katig ni Beteng—sapagka't kung makailan ko nang makasama, ni minsan man ay di pa gumasta. Maging sa pagsakay namin sa trambiya, maging sa pagkain namin ng sorbetes,

ay ¿maanong pabalat-bunḡa man lamang na magkunwaring dumukot sa bulsa?

—Ano ang hahanapin ninyo sa taong nagsasamantala?—ang masayang ikinabit ni Simón.

—Hindi gayon—ang tutol ni Pastor at hinarap si Beteng—Kayo ang nagaanyaya sa kanya ay talagang kayo ang dapat gumasta. Salamat at di kayo sinisingil sa kanyang abala at pagod...

—Mang Pastor!—ang tugon ni Simón—¿pinagtatanggol ba ninyo si Artemyo?

—Hindi po. Ipinaaalaala ko lamang ang ipinaguutos nḡ dakilang asal.

—At ¿kami pa pala ang lumalabas sa magandang ugali?—ang usisa ni Beteng.

—Hindi ko po sinasabi ang gayon—ang salag ni Pastor—nḡuni't ipinagugunita kong sa bibig nḡ mḡa lalaki ay alangang maglaro ang buhay nḡ kapuwa. Mḡa babai lamang ang naguutang dila. Mḡa musmos lamang ang nagnḡunḡusuan.

—How! ipshe!—ang putol ni Simón—Talaga pong si Artemyo ay lahi nḡ tak-sil: siya'y kapangpanḡan.

—Tama. Iyan ang totoo—ang dugtong

ni Beteng—pinapaghahari ang kanyang pagkakapangpanġan.

—Mġa kaibigan—ang mainit nġ saad ni Pastor—iHuwag ninyong hamakin ang kanyang lahi! Kapangpanġan man at Tagalog ay iisa nġ uri, at ang sumira nġ pagiisang iyan, ay yaon ang taksil na dapat pangilagan. Ang taong pumapatay nġ pagdadamayan nġ Pilipino ay yaon ang kalaban nġ bayan. Ang kalulwang nagtatanim nġ pagiiringan ay siyang uod na sumisira nġ laya at pagasa nġ lahat....

—Matutulis pong salita iyan!—ang pakli ni Simón.

—Nakasusugat ka po!—ang dugtong ni Beteng.

—Hindi, mġa kaibigan—ang ganti ni Pastor—kailan ma'y di ko magagawa ang sumugat sa kapatid. Nġuni't, oo; makikipaglaban ako sa kanino mang nagbibinhi nġ pagiiringan. Ang buhay ko'y aking itinataya lubha pa't ang pagiiringan ay ipupunla dahil lamang sa inggit sa isang lalaking kinakandong nġ palad...

—Na sa ibang bahay ka po!—ang paalaala ni Beteng—huwag ninyong lubusin ang pagalipusta sa mġa kaharap.

—Sa bahay na pinaghaharian n̄g di-
lim ay doon ko dinadala ang ilaw!—
ang matapang na sagot ni Pastor.

—Pawang kaululan ang sinabi ninyo!
—ang tumbas ni Simón.

—Utang na loob ay manaog na kayo
—ang taboy naman ni Beteng.

Tumayo si Pastor n̄g boong pagn̄gi-
n̄gitn̄git. Ang malas niya'y naglalagab-
lab. Maliksing kinuha ang kanyang som-
brero at anya'y:

—Dapat ninyo akong itáboy; dapat
ninyo akong turang ulol; sapagka't ang
gurong nagtuturo ay talagang kalaban n̄g
m̄ga musmos na tinuturuan.... Nakilala
ko na kayó ay dapat namán ninyó akóng
makilala.... Paalam sa inyo n̄guni't ala-
lahaning ako'y natatalaga sa ano mang
mangyayari...

Titig lamang ang isinagot n̄g dalawa.
Kaya't pumanaw na nagpuputok ang
dibdib ni Pastor. Samantalang nawawala
ang kanyang yabag ay patuloy sa pag-
walang imik ang dalawang nilisan.

—Mang Simón—ang mana'y saad ni
Beteng—yumaong galit na galit ang abo-
gado ni Artemyo.

—Walang kailangan—ang tugon nito—
iIbabagsak natin sila!...

—Iyan ang kanina pa'y inaantay kong
pumilas sa inyong labi...

Kumuha nġ kahon nġ tabako si Be-
teng at inalok ang kaharap. Kapwa
sila nagsuso at minsang pinagbuti ang
upo. Bago naganasang marahil ay yu-
mari nġ paghihiganti. Panahon lamang
ang makapaghubungkal nġ lihim.

Isang mahigpit na kamayan ang tu-
mapos nġ salitaan. At taglay ang galak
nġ pagasa na naghiwalay ang dalawang
nagtiyap.



III

MGA HALIK NG PAGIROG

NAGBABANĠUHANG sampagita, bulaklak na nagpuputġan, yaong tinutuhog ni Dolores, sa halamanan nila. Nagiisa siyang noon ay nagaaliw at pinalilipas ang mapanglaw na hapon. Sa isang upuang kawayan ay doon pinagbubuti ang pagyari ng isang kuwintas. Ang samyo na idinudulot ng mga ilang-ilang, ay sumusuob sa mabining dalaga. Marahan namang humahalik sa kanyang mga pisngi ang simoy ng hangġing nagmumula sa bukid. Samantalang sa kanyang ulunan, ay namamaypay ang magsġsing dahon ng kamuning.

Ang dilag ni Loleng noon ay lalong tumingkad kay sa dati. Bagay na bagay ang bagong gayak sa mayamang ganda nġ kanyang pagka binibini. Sa biglang malas lamang ay mahuhulaan nang siya'y bago pa lamang dumudunġaw sa pinto nġ pagibig. At upang patotohanang naninibago ang kanyang puso sa pagtibok nġ buhay sa pagkadalaga, ay masayang umaawit at sinasamyo ang mapapalad na sampagita.

—Kay bangō ninyo!—ang di napigilang wika at nilanġap ang samyo ng kanyang tinutuhog—iKay puti ninyo! iKay dunong nġ Diyos!...

Siya rin ang sumagot:

—Talagang kayo ay pinagyaman nġ kalikasan! iWalang haring makapagsusuot nġ inyong gayak! iSutla na di nilikha nġ kamay! At iputi, puting parang busilak!...

Dinugtunġan pa rin:

—Hindi lamang iyan ang inyong yaman. Sa samyo, bangō, halimuyak, ay kahanay kayo nġ mġa pangunahing bu-laklak na ipinagmamalaki nġ katalagahan....

Tinapos sa:

—Sa ulo, batok, at dibdib n̄g m̄ga dalaga sa Silan̄ganan, ay ginagamit kayong palamuti, katimbang n̄g rubi, perlas, at brilyante n̄g m̄ga dalaga sa Kalunuran. Yaon ay binibili n̄g daan, libo, o yutang salapi, n̄guni't kayo ay ipinagpapalit sa isa o dalawang sentimos lamang. iKay taas n̄g agwat n̄g halaga! Gayon ma'y lalong matayog ang inyong uri. Sila'y nagagamit lamang n̄g nakaririwasa, samantalang kayo ay pinakikibanḡan n̄g lalong dukha at n̄g lalong mayaman. Ikinahihiya silang igayak n̄g m̄ga dahop sa salapi, datapwa't kayo ay ikinararanḡal n̄g lahat...

At malaong nilan̄gap na naman ang mapapalad na sampagita. Mana'y pina-nood at kinausap:

—Gaano man ang inyong yaman, gaano man ang inyong dilag, ay di ko rin ipagpapalit sa inyo ang aking pinakamahal sa buhay, ang giliw n̄g puso ko, si Artemyo n̄g aking pagibig....

Isang halik ang biglang lumagot sa kanyang panḡun̄gusap; halik na tumunog sa kanyang pisin̄gi; halik na kaunahang idinulot n̄g pagibig. Nagulat at napalingon ang ating dalaga. Subali't

napatunĝô na lamang at pumatak ang luha, noong mapagtanto niyang si Artemyo pala ang nagbigay nĝ ligalig.

—Loleng!—ang bati nito—napoot ka yata...

—Di ko akalain...!—ang tugon naman nĝ binibini.

—Huwag; huwag kang magalit. Tinugon ko lamang ang utos nĝ aking pag-sintá. Kanina pa ako rito na nagsusubók sa iyo. Napanood ko ang lahat nĝ iyong ikinilos. Ang puso ko'y nila-nĝo nĝ tamis. At nakagawa tuloy nĝ kalapastanĝanan...

Patuloy sa pagkatunĝo ang binibini. Nahihiya. o napopoot mandin sa nang-yari. Talagang gayon ang dalagang Tagalog. Malambingin nĝuni't matampuhin. Magiliw datapwa't maselan. Sa di pag-imik ay sarisaring katuturan ang mapalalagay.

—Loleng—ang muling saad ni Artemyo—kahapon lamang binihis mo ang aking puso, nĝayon ay muli na namang pagdudusahin. iKay sawing palad ko!...

Hinawakan ang kamay ni Loleng na may hawak na sampagita. Naupo sa piling nito at sinapupo sa likod ang

dalaga n̄g kaliwang kamay. Bago nagpatuloy:

—Napakawalang awa ka! Parang tinakaw mo lamang ako sa galak. Mabuti pang di hamak ang di ako pina-n̄gakuan n̄g pagibig, kay sa naturang giliw ay nilulunod sa kapighatian...

—Ikaw ang may sala—ang marahang patlang ni Dolores—¿hindi ba kahapo'y isinumpa mong ako'y iyong igagalang?

—Tunay. At siya ko namang ginaganap...

—Paggalang pala ang iyong inasal!

—Hindi ba?

—Paglapastang!

—Na naman!

—At di ba pagapi sa dangal?

—Loleng, huwag mong isaloob ang gayon. Ang paggalang ay kapatid n̄g pagibig. May halik ang paggalang at may halik ang pagibig. Ang halik n̄g paggalang ay idinadampi sa damit, sa paa, ó sa kamay. Ang halik n̄g pagibig ay sa noó, sa pisn̄gi, ó sa kapuwa labi inilalagak. Pumili ka n̄gayon: ¿alin ang ibig n̄g Loleng ko?

—Ang halik n̄g paggalang—ang masaya nang tumbas n̄g binibini.

—Loleng, ilalong napopoot ka! Hagkan ko ang iyong damit ay tuturan mong kita'y nilalaro. Hagkan ko ang iyong paa, ay sasabihin mong kita'y inuuyam. Hagkan ko ang iyong kamay ay isasad mong kita'y binibiro...

Isang nġiti at isang titig ang iginanti nġ pusong nagtampo. Nagpalaot naman si Artemyo.

—Sapilitan, irog ko, na ang pipiliin mo ay ang halik nġ pagibig. Siya kong ginanap, tanda nġ aking pagmamahal. Doon ay kalakip na rin ang paggalang na aking ipinangako kahapon.

—Lahat nġ matwid ay na sa iyo!

—Sapagka't ako ay taong may katwiran...

—Sinunġaling!...

Isang malakas na tawag na "Loleng" ang gumambala sa paguulayaw nġ dalawa. Yaon ang makapangyarihang tinig ni kapitana Martina. Lumiaġos ang tinawagan, bago nagpaalam sa kasi:

—Artemyo, tinatawag na ako nġ Tiyang.

—Lilisanin mo ba ako?—ang lambing naman nġ binata.

—Pumanhik tayong dalawa.

—Baka di maganda ang gayon?

—Mauuna ako't sumunod ka mamiya.

—Mabuti pa.

—Aantabayanan kita?

—Asahan mo.

At tumalikod ang binibini matapos ihandog sa giliw ang isang kumpol ng sampagita. Handog na waring walang katuturan, nguni't minahal ni Artemyo. Sapagka't yaon ay nilagakan muna ng isang halik ng kanyang pinopoon. At sinasamyo ng binata samantalang pinaonood niya ang pagyaon ni Dolores.

Noon nama'y naglilikom na ng liwanag ang ilaw ng sangdaigdig. Ang dilim ay marahang nagbubuka ng pakpak. Nagsisimula na ng pagawit ang panglaw at lungkot ng gabi. Mana'y marahang namumukadkad sa kaitaasan ang mga sampagita sa bukid ng Diyos, iyang mga bituing nagpapagunita ng luwalhati sa kabilang buhay.

Malaong sandali pa ang lumipas, bago narinig ang:

—Magandang gabi po—na patao ni Artemyo upang tumupad sa pangako.

—Magandang gabi po naman—ang pa-

kunwaring salubong ni Dolores--Tuloy kayo....

Pumanhik ang panauhin at nagtuloy sa salas. Doon ay inabot niya si kapitana Martina. Nagbigay nġ galang at payapang naupo. Si Dolores naman ay naupo na rin. Ito ang nagbukas nġ salitaan:

—Saan po kayo nanggaling?

—Doon po sa bahay.

—Nġayon lamang kayo naligaw dito ah—ang pangatlo ni kapitana Martina.

—Bakit naman po?—ang tutol nġ binata.—Noong lamang isang linggo ay narito kami.

—Siya nġa pala—ang patalo na nġ kapitana—at noon nġa pala kayo nagharana. Hanggang nġayon ay di ko pa nalilimot, yaong inawit ni mang Huwan na *ayaw ko sa intsik...*

At tinapos sa halakhak. Tawa rin ang itinugon nġ dalawang kapulong.

—Bakit po ba hindi ninyo kasama noon si mang Beteng?—ang usisa nġ binibini.

—Ayaw na pong makibarkada sa amin —ang tugon ni Artemyo.

—Kung ilan nang haranahan iyan na di nakakasama yaon eh....—ang katig ng kapitana.

—Napupuna ko nga rin—ang dugtong ng dalaga.

—At bakit di mo mapupuna?—ang biro ng ali—sa iyon lamang ang itinatanggi mo...

—Ang Tiyang naman!—ang tanggi ni Loleng.

—Ehem!—ang salo ni Artemyo.

—Siya; kung ayaw ka ng itinatanggi ay minamahal...—ang dugtong ng kapitana.

—Nagkatabas tuloy!—ang tawa ng binata natin.

Isang makahulugang irap ang inihagis ng dalaga kay Artemyo. Ginanti naman nito ng isang titig. Ano pa't mga mata ang pinapagusap. At sa mukha nila ay nababasa ang pagkainip sa matandang kaharap. Salamat at ito ay mapagbigay at nataunang nanalo noon sa pangginge; kaya malamig ang ulo at binigyang panahon ang dalawang puso upang magulayaw. Lumabas ang kapitana at nilisan ang mga kausap. Lumaya ang dalawang pusong nagtatalik sa galak.

—Waring hindi batid ng ali mo ang ating lihim?—ang saad ni Artemyo.

—Hindi, at magingat ka—ang tugon ni Dolores.

—Naparito na ba si Beteng?

—Oo. Di ko pa pala naibabalita sa iyo na sila ay nagharana rito.

—Kailan?

—Noong Huwebes nġ gabi.

—Sino sino sila?

—Wala akong nakilala; nġuni't sa inyong magkakasama noong araw, ay si Beteng lamang ang kasama.

—Nagsarili na!

—Hindi lamang iyon. Sumulat pa sa Tatay na ikaw daw ay alipin lamang. Nagsisilbing-kanin ka raw sa kanya, kaya di ka dapat tanggapin dito.

Napipi at namutla sa galit ang nabiglang binata. Ang binigkas na yaon nġ kanyang kasi ay naging matunog na kulog sa kanyang pangdinig. Siya ay nangliit. Aywan kung inapi nġ kahihiyan ó sinupil nġ poot. Datapwa't sa pagyaon nġ ilang sandali ang mukha niya'y naging maamo. Tulad sa nagkasalang humihingi nġ tawad.

—Salamat na lamang—ang patuloy nġ dalaga—at ako ang nakatanggap. Kaya,

ni ang Tatay, ni ang Tiyang, ni sino pa man dito, ay walang nakabatid.

—Nahan ang liham?—ang mana'y usisa ni Artemyo.

—Sinunog ko.

—Bakit mo sinunog?

—Sapagka't gawa ng taksil.

—Di mo na ipinabasa sa akin?

—Baka pa matunghayan ng iba.

—Bakit mo nalamang sulat niya?

—Dahil sa may lagda.

—Nilagdaan!

—Maniwala ka.

—Ng pangalan niya!

—Tunay.

—Kay tapang!

—Duwag, ang sabihin mo.

—Sayang at di ko nakita!

—Huwag na.

—Nananalig ka naman?

—Hindi! iHinding hindi!

—Bakit?

—Sapagka't walang katotohanan.

—Totoo yaon!

—Ano sa akin?

—Tapat ang sumbong niya.

—Walang ano man.

—Paniwalaan mo!

—Ipalagay mong ako'y naniniwala. Mang-ing totoo nang busabos ka niya, ¿ano nġayon? ¿Ang pagibig ba'y nahahadlangan nġ mġa bagay na iyan?

—Dolores!

—Kung ang pagirog mo ay naigigiba nġ inggit at imbot, ang pagibig ko ay hindi. Matibay. Kasingtibay nġ moog. Kamatayan lamang ang makapagwawalat.

—Bulaan!

—Masusubok mo-rin.

—Nasubok kò na. Sa isang halik lamang ay pinatulo mo na ang iyong luha....

—Sapagka't nalunos ako sa aking pagkadalaga.

—Di lalong malulunos ka sa palad mong tatamuhin nġ isang busabos?

—Kabila man nġ busabos, kung iniirrog ko at minamahal, sa akin ay daig pa ang haring na sa trono nġ luwalhati.

—Diyata?

—Tunay.

—Ang katunayan?

—Kinamit mo na.

—Yaon bang tinamo sa lakas-loob; halik na itinanġis nġ hinagkan, ay siya mong patunay?

—Sapat na yaon.

—Ang pagibig ay walang kabusugan!

—Hindi pa panahon.

—Lahat ng sandali ay dapat pakinabangan.

—Sa iba nang pagkakataon.

—Naipagpapaliban pala ang sanla ng pagibig....

At tinapos sa pagpisil ng kamay ng binibini. Tumayo ang binata at naglingon-likod. Ang dalaga ay kinabahan at umiwas na:

—Hayun ang Tiyang!

—Mamatay na tayo!

At boong tapang na inilagda ni Artemyo ang pangalawang halik ng pagirog sa mapulang pisngi ni Dolores. Ito ay nagitla, subali't nang matiyak na di sila napuna ng kapitana Martina ay magiliw na nag-sabing:

—Pangahas ka rin!

—Kay palad ko ngayon!—ang galak ni Artemyo—Sa gabing ito nahawi ang dilim ng aking pagasa. Nababanaag ko na ang liwayway ng aking kapalaran. Datapwa't, Loleng, Loleng, huwag ka sanang padadala sa dila ng mga umaagaw ng aking dangal....

—Hindi, at isinasamo ko sa iyong

huwag mo nang mababanggit kay mang-Beteng ang liham niya sa Tatay.

—Asahan mo.

—Ilagan mo sana ang sigalot.

—Huwag kang magalaala.

—Talagang gayon ang kalulwang sawi sa pagibig. Parang ulol na di nalalaman ang ginagawa. Awa ang dapat ihandog sa kanila.

—Siyang totoo.

—Naku, sukat bang siraaan ka! At sirapa namang kahahalataan nġ pagkaimbi....

—Kay pangit!

—Sawing palad na lalaki!

Ang orasang nakasabit sa dakong itaas nġ pinto, ay nakisagot din. Walong pantig nġ kanyang batingting ang pinaltik. Ang oras nġ pagaalaala sa mġa kalulwa sa purgatoryo'y siyang ibinansag.

—Ika walo na pala!—ang saad ni Artemyo na dinukot at minasdan ang kanyang orasan.

—Ay ĩano kung ika walo na?—ang putol ng dalaga—ĩnaiinip ka ba?

—Naiinip? ĩMainip ako sa piling mo? Loleng, kung makukuha ko lamang ang aking puso, at ihaharap ko sa iyo, ay makikita mong sabik na sabik sa iyong.

dilag at pagmamahal. Nais ay matali na sa puso mo kung mangyayari...

—Bulaan!

—Hindi. Talagang wala akong pinapanġarap, kung di ang pagbabagong buhay natin. Maging malaya tayo sa pagduduyan sa tuwa... Nġuni't samantalang di pa namimitak ang ating araw, ay sumunod na muna tayo sa palakad nġ panahon.

Hindi tumugon ang dalaga sapagka't noon ay sa susunġaw sa pinto si kapitana Martina.

—Maalaala ko pala—ang wika nito—huwag kayong mawawala sa isang linggo, at ating ipagdidiwanġ ang kaarawan ni Loleng.

—Sa isang Linggo po?—ang tanong ni Artemyo.

—Sa ika 21 nġ kasalukuyan—ang salo naman nġ dalaga.

—Bulaklak nġa pala kayo nġ Mayo—ang pagpuri nġ binata.

—Kaya po kasingganda nġ kamya—ang dugtong nġ kapitana.

—Ang Tiyang naman!—ang hinampo ni Loleng—para pa tayong taga Palanyag.

—Kung ayaw ka nġ kamya ay asusena. Kung ayaw ka ng asusena ay sampagita.

Kung ayaw ka nġ sampagita ay rosál. Alin man ang iyong piliin ay bagay sa iyong kagandahan—ang pagtatanggol nġ kapitana na lubhang nawiwiling biruin ang kanyang alaga.

—Siya nġa—ang ayon ni Artemyo.

—Siya na kayo—ang salag ni Dolores.

Napatigil ang salitaan sapagka't noon ay may narinig silang yabag. Ilang sandali lamang na nagdiwang ang pananahimik at napagsino na nġ tatlo. Tinig ni kapitang Andoy ang kanilang napansin. Hindi nagkabula ang palagay. Sumipot sa pinto ang matanda. Sinalubong naman ni Artemyo nġ bati nġ paggalang.

—Nakasabay ko po nġayon si mang Beteng—ang balita nito.

—Saan?—ang usisa nġ kapitana.

—Sa trambiya—ang patuloy nġ matandang Andoy—at sinabi sa aking magdadala siya rito nġ komparsa sa araw mo Loleng.

—Ehem! iehem! iehem!—ang tikim nġ kapitana.

Nagtitigan naman ang dalawang pusong naglilihim. Bago nagnġitian nġ nġiti nġ kasyahang loob.

—Hindi raw ikahihiya sa mġa panauhin ang kanyang dadalhin dito—ang dugtong

pa nṅ nagbalita—marahil daw ay mṅa labing anṅ katao.

—Kay dami! iTalagang pangatawanan! —ang tuwa nṅ kapitana—Kayo mang Artemyo, magdala rin kayo.

—Na naman ang Tiyang...—ang hadlang nṅ dalaga.

—Ito nṅa naman—ang habol nṅ kapi-tang Andoy na hinarap ang mapagsisteng asawa.

—Susubukin ko po—ang tugon naman nṅ binata.

—Baka matuloy!—ang pakli nṅ kapitana—Biro ko lamang iyon.

—Titingnan ko rin po—ang saad ni Artemyo na napapasubo.

—Huwag na—ang pigil naman ni kapi-tang Andoy—sapagka't sapat na ang dadalhin ni mang Beteng. Bakit nababalitaan kong waring may bigat ng loob sa inyo, ay baka kung ano pa ang ipakahulugan noon.

—Siya nṅa—ang ayon ni Dolores.

Hindi nakasagot si Artemyo. Namutla at napipi. Sumikdo ang loob. Marahang sumusubo ang pagnṅingitnṅit. Titig na lamang ang ipinukol kay Dolores. Ito naman na nakaramdam nṅ kagipitan noon

ay sinamantala ang pagtatanggol sa giliw.
Anyay:

—Dumalo na lamang kayo at isama ninyo ang inyong mga kaibigan.

—Maaasahan po—ang pakli ng binata.

—Baka di kayo sumipot?—ang habol ng kapitana. Martina.

—Baka pangakong napako iyan—ang salo naman ng kapitang Andoy—bakit na sa Pako pa naman tayo.

—Hindi po—ang sagot ni Artemyo—maaasahan po ninyo.

At tumayong kinuha ang kanyang sombrero bago nagpaalam.

—Aalis na ba kayo?—ang saad ng kapitana.

—Maaga pa naman—ang dugtong ng kapitang Andoy.

—Mayroon pa po kaming paroroonan—ang pakunwari ng binata.

Kinamayan ang tatlong lilisanin. Nanaog na nalulunod ang puso. Sumisinghap sa tuwa at sumisinghap sa galit. Naluluoy sa tuwa dahil sa pagtatamo ng halik ng pagirog. Nilalagnat sa galit dahil sa paninira ni Beteng. Gayon may tahimik na yumaon ang kalulwang itinaguyod ng mapalad na pagkakataon.



IV

MASIGASIG NA KILOS NI PASTOR

MGA kaibigan—ang bati ni Pastor sa m̃ga kasamang kanyang inabot sa isang kamalig sa daang Penyapransiya, doon din sa Pako, na nagsasanay ng pagtugtog—kayo yata ang dadalhin ni Beteng sa bahay nila kapitang Andoy?

—Oo—ang tugon ng may bigwela.

—Utang na loob ay huwag kayong sumama—ang patuloy ni Pastor—at ibitin ninyo sa kahihiyan ang taong yaon...

—Bakit?—ang sambot ng may gitarra.

—Mangyari ay kung ano anong paninira ang ginagawa kay Artemyo—ang tugon ng Pastor—at kayo ay dadalhin doon upang patunayang lalong malakas siya kay Artemyo. ¿Yaon ba ay gawa ng kasama?

—Ang lagay pala ay nagkagalit sila ni Artemyo?—ang usisa nġ nakasalaman.

—Oo—ang paliwanag ni Pastor—at ang pinagmulan ay dahil kay Dolores.

—Ano ang nangyari?—ang pagkamangha nġ lahat.

Lumingon muna si Pastor, bago sumagot:

—Lubhang katawatawa.

—Bakit?—ang pagkasabik nġ ilan.

—Makinig kayo—ang patlang ni Pastor—Si Artemyo ay palaging niyayaya ni Beteng upang haranahin si Dolores, dahil sa ito ay artista at may mayamang tinig. Siya, si Artemyo, ang palaging pinaaawit sa kanilang pagtapat. Nġuni't si Dolores ay di rin mahabag sa kaawaawang Beteng. Ang pista pa nito ay si Artemyo ang napusuan. Ano pa't ang tulay ay siyang naibigan.

—Aha!—ang pagtataka nġ may dalang biyolin.

—Siya nġa—ang ayon naman nġ may hawak na gitarra—at noong magharana kami noon araw doon, ay umalis iyang si Beteng nang hindi man lamang nagpaalam sa amin.

—Nakahalata marahil!—ang hatol nġ may katandaan na.

—Nakita na ninyo?—ang habol naman ni Pastor—Pati kayo ay hinahamak gayong nangungutang lamang ng loob.

—Ano ang magagawa natin sa taong walang turing?—ang tanong ng may hawak ng bigwela na malaon na yatang may poot kay Beteng.

—Gayon pala! ¿Bakit pa kayo sasama sa kanya?—ang ulos ni Pastor.—Ipagmamalaki lamang kayo at pagkatapos ay diyan na kayo...

—Bakit namang pumatol si Artemyo?—ang usisa ng isa.

—Tao namang ito!—ang agaw ng kasamahan din—¿May manok bang tumanggi sa palay?

—At ¿ano naman ang dapat itawag sa lalaking iniibig ng babai ay nagwawalang bahala?—ang tanong ni Pastor.

—Binubai!—ang maagap na salo ng may katandaan.

Isang matunog na halakhakan ang pumutok.

—Samakatwid—ang hadlang ni Pastor—ay tumupad lamang si Artemyo sa kanyang tungkulin upang huwag matawag na binabai...

—Katwiran—ang hatol ng marami.

—Bakit nagagalit si Beteng at sinisiraang mabuti si Artemyo?—ang tanong pa rin ni Pastor.

—Paano'y naagawan nġ tuson!—ang salo na naman nġ mapagsiste.

Panibagong halakhakan na naman.

—Isang sagot nġayon mġa kasama—ang saad ni Pastor—¿sino nġayon ang dapat samahan, si Artemyo ó si Beteng?

—Bakit ba? ¿Magdadala rin ba nġ komparsa si Artemyo?—ang usisa nġ isa.

—Binabalak ko sana—ang tugon ni Pastor—pagka't totoo akong nasakitan noong sabihing si Artemyo raw ay taksil dahil sa kapangpanġan...

—Sinabi ni Beteng ang gayon?—ang pandidilat nġ isang kapangpanġang bandurista.

—Maniwala ka kasama—ang patigas nġ tinanong—at kaya sinabi ang gayon ay dahil sa nabigo sila sa akin. Ako'y inamuki nila ni Simon, upang agawan nġ dangál si Artemyo, datapwa't nagkagalit lamang kami sapagka't di ako pumayag...

—Sa inyo ako sasama—ang pagkukusa na nġ banduristang kapangpanġan.

—Ako man—ang habol n̄g may hawak na biyolin.

—Ibilang na rin ninyo ako—ang sunod n̄g may plauta.

—Welga na tayong lahat—ang sabi naman n̄g isa.

—Welga! ¡Welga! ¡Welga!—ang sagutan na n̄g lahat.

—Mabuhay si Artemyo!—ang sabi naman ni Pastor.

—Mabuhay! ¡Mabuhay! ¡Mabuhay!

At tumugtog sila n̄g isang masarap na tugtugin, tanda n̄g tagumpay ni Artemyo. Galak na galak naman si Pastor. Samantala'y nagpapaindayog na mabuti ang tinig n̄g biyolin.

Natapos ang pamamayani n̄g bigwela at ang bibig na naman ni Pastor ang narinig.

—Upang malubos ang ating galak ay huwag ninyong sasabihin kay Beteng na hindi na kayo sasama sa kanya.

—Siya n̄ga—ang ayon n̄g iba.

—Ang sarap niyan ay magaanay siya n̄g wala!—ang salo n̄g isa.

—Gayon ang dapat sa taong umaagaw n̄g dangal—ang katig ni Pastor—Ibitin sa kahihiyan. Isubo sa kagipitan.

—May balita pa akong nilalakad daw ni Simon na si Artemyo ay alisan nġ tungkulin sa “Kumilos Tayo”—ang saad nġ isang kanina pa’y ibig maglahad.

—Iyan ay pakana ni Beteng—ang sagot ni Pastor—¿Ano raw ang dahilan?

—Sarisari—ang salo nġ tinanong—Hindi raw dapat bigyan nġ tungkulin dito ang isang dapo lamang. Kabagong-bago raw dito, ay nais nang lagpasan ang mġa kanayon. Isang bata raw lamang ay ibig nang maghari. Kung minsan ay sinasabing mapagsamantala raw. Ang salapi raw nġ Samahan ay kinukupit. Marami at napakarami pa ang dungis na ipinupukol sa mukha ni Artemyo.

—Narinig na ninyo!—ang saad ni Pastor—Linawin natin: hindi raw dapat bigyan nġ tungkulin ang isang dapo. Katwiran, nġuni’t ¿bakit nila natitiis ang mġa dapong naghahari sa ating bayan? At ¿dapo ba si Artemyo? ¿Ano kung kapangpanġan siya? ¿Hindi ba pilipino rin? ¿Maaari bang magsarili ang Tagalog nang ang Kapangpanġan ay hindi? ¡Napakarupok na pagkukuro! Ang masasabi ko’y nakikilala nila ang dapong kapatid din nila, datapwa’t hindi nila

nakikilala ang tunay na dapong dito ay tumawid. Kung nakikilala man ay kinatatakutan. Ngayon at kalahi ay halos sakmalin. Nguni't kung maputi, kahi't na lumapastangan, ay nginingitian din. Sinusurot, dinuduro at pinamumukhaan ang kabalat, subali't ang dayo ay saka lamang mamura kung nakatalikod...

—Siyang totoo—ang tangō ng ilan.

—Kabagongbago'y nais nang lagpasan ang m̃ga kanayon?—ang dugtong ni Pastor —Pasalamat tayo at hindi pa man ay nagpapakita na ng lakas at magagawa. Kung kaya siya lalagpas sa taga rito, ay sapagka't dapat siyang lumagpas. Ano man ang gawin ni Artemyo, kung talagang magaling sila, ay sila rin ang mamaibabaw. Ang iba pang dahilan ay pawa nang paninira na m̃ga isip-lamok lamang ang mananampalataya...

—Ang inggit ay talagang nakalilikha ng sarisaring paninira—ang payo ng may katandaan.

—Kaya matakot at mangilag tayo—ang ayon ng iba.

—Walang sasama kay Beteng—ang palaalang muli ng banduristang kapangpangan...

—Wala! ¡Wala! ¡Wala!—ang ayon ng lahat at pinamayani na naman ang kanilang mga hawak na kilabot ng panglaw, taga-taboy ng lungkot at lumilikha ng tuwa: ang biyolin, bigwela at bandurya.





V

¡WALANG SALA! ¡ANG TAGUMPAY AY ATIN!

MALIGAYANG umaga noon. Sa Looban, daang tumutumbok sa malaking pagawaan ng tabako, ay maraming kawal ng pawis ang nagma-madalan. Sa una'y langkay ng mga babai; sa dako roon ay nagsusumugod na mga lalaki; sa dako rito ay sunodsunod na may mga kagulangan na; at sa huli ay mga dalaga at binatang pawang nagtatalik sa galak. Walang alinlangang sarisaring bagay ang napaguusapan. Minsan ay may nagtatalumpati sa pagtatanggol sa kanyang ipinaglalaban. Minsan ay pumutok ang halakhakan. Ganyan ang mapupuna sa alin mang pangkatin.

Sa karamihan ay may namumukod na dalawang lalaki. Ang isa ay may magarang gayak; pulus na puti ang suot at korbatang sutlang granate ang nakatali sa liig. Isang sombrero ang kalasyaw ang nakatakip sa ulo, na lalong nagbibigay ganda sa mayamang tabas ng mukha. ¡Kay kintab ng sapatos na abelyana! At ikay lapad ng liston! Sa bikas at pananamit ay nagbabansag ng kalwagan sa buhay. Samantalang ang isa ay nakabarong intsik lamang. Lumang luma na ang pahang sunong. At isang tsinelas na kupas na ang kulay ang nagtatanggol sa paa. Naglalarawan ng karalitaan. Yaon, ang makisig, ay ang binatang Beteng. At ito ang anak-dalita, ay si Simon. Sa agos ng mga manggagawa sa Tabakalera ay napaand sila.

—Sa linggo na ang araw ni Loleng—ang sabi ni Beteng kay Simón.

—Oh, handa na po ba ang komparsa natin?—ang tanong naman nitó.

—Hindi ko nga po matiyak kaya ko po kayo inabangan.

—Bakit po?

—Mangyari'y naparoon ako kagabi kina Dolores ay ibinalita sa akin ni ka-

pitana Martina, na si Artemyo raw ay nangako rin ng komparsa.

—Lalong magaling. Ngayon tayo mag-susubukan ng gilás. Upang makilala ang inyong katayugan kay Artemyo ay dapat kayong iyagapay sa kanya. Walang salang magbibigti siya sa kahihiyaan...

—Huwag tayong umasa.

—Bakit po?

—Hindi ko pa natitiyak na mabuti ang ating komparsa. Malaon ko nang kinausap sila at hindi ko na hinarap uli.

—Tiyakin mo po; at nang mapatabi ang gigirigiring iyan....

—Bah! Kung lumabas na magaling ang kanyang dala, ay di naagawan tayo ng dangal?

—Hindi po! iMagagaling tumugtog ang tao natin! Tiyakin mo po lamang ay di na kayo dapat magalaala pa.

—Baka tayo mabitin ah!...

—Sa ano pong dahilan?

—Kung di tayo siputin.

—Bakit po? iNauulol ba sila? iBinyaran at di sisipot? iMagkano po ba ang ibinayad ninyo?

—Wala pa akong ibinibigay kung hindi limang piso lamang na ibibili raw ng kuwerdas.

—Sa tao po, imagkano ang isa?

—Huwag ko raw pong alalahanin.

—Iyan ang masama. Ang mabuti ay bayaran natin; upang kung hindi sila sumipot ay magkaroon tayo ng bibig.

—Gayon din po ang naisip ko kagabi kaya ninais kong makausap kayo...

Isang malakas na sigaw na *itabi!* ang lumagot sa salitaan. Noon ay humahagibis ang dalawang karitela na naguunahan. Ang una'y pawang dalaga ang lulan, at ang huli'y pawang binata naman.

Lumingon at tumabi ang dalawang naguusap, bago nagpatuloy si Beteng:

—Kasama rin lamang ninyo rian sa Kompanya ang pinaka maestro nila, ay kausapin lamang ninyong mabuti kung mangyayari.

—Opo, at titiyakin ko.

—Ibigay mo po lamang ito—at dumukut sa bulsa ng isang papel na sasampuin—sabihin ninyong para sigarilyo lamang iyan.

—Kay dami naman!

—Daragdagan ko pa po iyan, mapuri lamang tayo ni kapitang Andoy.

—Walang sala! ¡Ang tagumpay ay atin! ¡Alin daw po bang komparsa ang kinuha naman ni Artemyo?

—Hindi ko po masabi.

—Tiyak daw po bang sisipot?

—Marahil. ¡Mangangako ba iyon ng papaano? Mawawalan ba ng kakilalang komparsa iyon, ay sa siya ay isang artista.

—Hindi rin siya dapat humara sa ating dadalhin.

—At mabuti namang magdala siya, upang mapalapat ang kanyang kapanġahasang bumanggá sa tapayan.

Na sa tapat na sila ng Tabakalera.

Kapwa sila tumigil at tumayo sa tabing daan. Noon ay dating at dating ang kawal ng paggawa. Babai at lalaki, dalaga at bagongtao, matanda at bata, ang nagsisisipot. ¡Kay daming anak ng pawis!

—Ano pong oras ang sasabihin kong ipagkikita natin sa linggo?—ang mana'y tanong ni Simon.

—Ika siyam ng umaga. Doon na tayo magtagpo sa bahay nila Loleng—ang tugon ng kausap.

—Sasabihin ko po.

—Baka malimutan ninyo?

—Hindi po.

—Baka tayo mabitin?

—Huwag mo pong alalahanin. Ako ang bahala.

—Walang sala! ¡Ang tagumpay ay atin!

Nagtuloy nġ pumasok si Simón sa malaking pagawaan. Si Beteng ay yumaon naman. Hanggang doon natapos ang usap nġ dalawang magkatiyap.





VI

ANG ARAW NI LOLENG

MADALING-ARAW ng linggò. Noon ang ganap na ika labing walong Mayo ni Dolores. Mula sa pinto ng Simbahan sa Pako ay dalawang babai yaong lumabas. ¡Mga pusong banal yata! At lumakad silang patungo sa daang Pas. Ang maliwanag na tanglaw sa daan, ay siyang nagsabing yaon ay si Dolores kasama ni kapitana Martina. Galing silang nagsimba na pinasalamatan sa Diyos, ang masayang pagsapit ng kaarawan ni Loleng. Ang malamig na simoy ng hangin, ang mga patak ng hamog sa damo, at ang liwanag ng ilaw sa daan, ay siyang unang naghandog ng maligayang bati sa mapalad na dalaga.

Dumatal sila sa bahay na ang lahat ay nagsisikilos na. Ang tunog ng pinggan, taginting nġ kubyertos, at sagitsit nġ mantika ay siyang unang maririnig. Bago mapupuna ang bangô na isinasabog nġ hangin: ang amoy nġ ginisa. Kung minsan ay namamaibabaw din ang iyukan nġ mġa inahin, tandang at kapon na manok. Ito ang mġa martir nġ pista. Ang lalong mainġay at di maipagkakaila ay ang iyak nġ baboy. Tatlo ang pinatay noon.

Sa kabahayan naman ay iba ang kilusan. Ang tinig ni kapitang Andoy ay siyang naghahari. Utos dito, utos doon ang ginagawa. Lagatok naman nġ mġa upuan, at lagaslas nġ dahong saging na ikinukuskos sa sahig, ay siyang sumasagot. Gayon na lamang ang paghahanda.

Sa siwang nġ mġa bundok sa silanġan ay masayang dumudunġaw ang buhang liwayway. Marahang tumatakas ang dilim at panglaw. Ang galak at liwanag naman ang bumabanġon. Mana'y boong ningning na sumikat ang ilaw nġ sangkatauhan, upang batiin marahil ang dalagang sapupo nġ tuwa sa araw na yaon.

Ang mġa taong naglalalakad sa daang Sagat, ay napapatigil sa tapat nġ bahay

ni kapitang Andoy. Pawang humahangâ sa napakakisig na pagkagayak. Mahahalagang enkahe ang naglawit sa itaas ng mga durungawan. Sa gitna nito'y malapad na lasong rosas ang pinagbuhol ng bikas paroparo. Sa mga haligi ng kabahayan ay tungkos ng sarisaring bulaklak ang naglawit. Magagarang san pransisko ang halamang nagtanod sa mga pinto.

—Dapat nang pagubusan ng kaya si Loleng ang wika ng isang napatigil—sapagka't siya ay bugtong na anak ni kapitang Andoy.

Ilang sandali pa ang nakaraan, bago sumipot si Beteng. Makisig na makisig ang binata at masayangmasaya na pumanhik.

—Kay aga ng buwisit na ito!—ang nasabi sa sarili ni Loleng nguni't masayang sumalubong—Tuloy kayo.

—Maligayang bati po—ang bungad na wika ni Beteng at kinamayan ang dalaga.

—Salamat po.

—Magandang araw po mang Andoy—ang paggalang nito sa kapitan.

—Tuloy kayo—ang tugon naman ng tinukoy.

Nagtuloy ang makisig na binata. At kung gaano ang bikas niya noong masalubong natin sa daan Looban ay lalo at higit ngayon. Ang buhok ay hating hati at ang mukha ay pinahiran ng pulbos. Bagong korbata na naman ang nakabitin sa liig, datapwa't walang alinlangang buhat sa almasen ni Siyap sa Eskolta. Ang ternong lana ng pusong gumilas, ay siyang nagbabansag ng kabusugan niya sa pananalapi. Nguni't ang lalong kapunapuna, ay ang malalaking brilyante na nagniningning sa dibdib at mga daliri. «Inubos ang peseta!», ang sabi nga ni Dolores sa sarili. Subali't lalo siyang namangha noong buksan ang balutang dala, na anyay;

—Aling Loleng kung kayo man ay nagagalak sa pagsapit ng inyong araw, ay lalo at higit ako. Ang katunayang di magkasya sa puso ko ang tuwa, ay di na matutuhan kung alin sa likha ng tao o likha ng katalagahan ang pipiliin kong ihandog sa inyong mga yapak. Pagyamanin mo po ang nakaya ng inyong lingkod.

Pandidilat ng mata ni kapitang Andoy;

matulin na paglabas ni kapitana Martina; at isang «salamat po» lamang ni Dolores, ang tumugon sa mahabang talumpati ng binata. Samantalang mula sa pinto ay maraming mukha ang nakasungaw na sabik makakita ng handog ni Beteng. Yaon ang mga katulong sa paghahanda, at mga kapit-bahay na katapatang loob. Ang matandang kapitana na inip sa matagal na pagkalas ng tali, ay tumulong kay Beteng bago bumulalas:

—Kay ganda nito!

At itinaas ng kanyang kamay, ang isang alpiler na may malaking bató, saka tinigtigan ng papikitpikit pa. Ang mga nanonood, maging si kapitang Andoy, ay napipilan. Si Dolores naman ay pinapagpapawis ng panginimi. Nahihiya na di maintindihan. Lalo namang sumisigla si Beteng ng pagtatanghal ng kanyang handog. Sa ibabaw ng mesang marmol ay inihanay na lahat upang hangaan ng nagsisitingin.

—Kay dami naman!—ang wika ni kapitang Andoy, nang mamalas niya ang mga botelya ng pabango, ang kaha ng pulbos, ang magarang pulbera, ang

salaming pangmesa, ang sutlang pamaypay, at ang isang dosenang panyolitong nagpuputian.

—Inubos na niyong hinakot ang tinda sa Eskolta!—ang bulalas uli ni kapitana Martina, na idinuro sa alampay ni Dolores ang mahalagang alpiler.

—Aba! — ang magkakatulad namang paghanġa nġ ilan. Noon lamang sila nakamalas nġ gayong mġa alay. At isa isang nagsilabas upang ipagpatuloy ang ginagawa.

Gayon man ang paghanġa sa mġa handog ni Beteng ay lugi rin siya. Oo, lugi siya, sapagka't bahagya nġ bayaran nġ nġiti nġ kanyang iniirong. Nġuni't palibhasa'y dalagang Tagalog, ang yumi, hinhin at kadakilaan nġ asal, ay di rin nasusupil nġ pagkawalang loob kay Beteng. Si Dolores ay si Dolores din. Siya rin ang dalagang mapanghalina. Ang katotohanan ay ang anyaya niya kay Beteng:

—Tayo po ay magagahan muna.

—Salamat po—ang tugon nġ binata.

—Kung di kayo magaagahan dito, ay di ko namang tatanggapin ang mġa handog na iyan—ang tampo nġ dalaga.

—Naku naman!—ang n̄giti ni Beteng.

—Siya n̄ga; tayo na muna magagahan—ang dugtong ni kapitang Andoy.

—Salamat po—ang ulit n̄g binata.

—Anong salamat? Tayo na—ang salo n̄g kapitana Martina.

—Nakatapos na po—ang tanggi rin ni Beteng.

—Ay ano kung nakatapos?—ang sambot ni Dolores—Ang agahan natin ay laan sa nakatapos na.

—Busog pa po ako—ang ayaw n̄g binata.

—Hindi naman handa sa gutom ang agahan dito—ang pagtatanggol n̄g dalaga.

Natapos ang pakunwari n̄g binata sa ganap na pagsuko. At ilang sandali pa ay napanood nang humihigop n̄g siku-late at nagpapahid n̄g mantikilya sa tinapay.

—Sinapul na mabuti ang handa!—ang wika n̄g isang batang utusan na sumisilip mula sa kusina—iPati agahan ay tinodas na!...

—Hayop! iHayop!—ang parang tugon naman ni kapitana Martina na nakahuli sa sumisilip at nilapirot ang tayn̄ga.

—Aray!... iaray!...—ang iyak na lamang n̄g nadakip.

Salamat sa pagdatal nġ ilang panauhin, at binitiwán din nġ kapitana ang nahuli. Pumasok at sumalubong nġ boong galak. Ang dumating ay dalawang dalaga at isang binata. Tumayo si Dolores sa mesa at pinakapilit na makisalo ang mġa bagong panhik. Ilang sandali pa ay anim katao na yaong magkakasalo.

Sarisaring mġa biro, sarisaring mġa pagpuri ang naghari sa boong pagkakainan. Minsan ay mamayani si kapitang Andoy, at kung minsan ay mamaibabaw si Beteng. Datapwa't si Dolores ay nġiti lamang ang inilalaban. Matagal-tagal din bago sila nagkatapos.

Noon nama'y matindi na ang sikat nġ araw. Dating at dating na ang panauhin. Kanina ay mġa dalaga. Nġayon ay mġa binata. Mamiya'y dalaga na naman. At marahil ay binata ang susunod. Dapat magkagayon: sapagka't araw nġ bulaklak ay bulaklak din ang dapat magdiwang. At kung saan natitipon ang mġa bulaklak ay doon nagkakagulo ang mġa bubuyog at paroparo.

Halos sikip na ang bahay ni kapitang Andoy. Bawa't dumatal ay «maligayang bati» ang namumulas sa mġa labi. Da-

tapwa't si Artemyo, ang binatang giliw ng ipinagdidiwang, ang pusong lalong mapalad, ay di pa sumisipot. Gayon man ay di kapunapuna ang pagkawala nito sapagka't si Dolores lamang marahil ang di nakalilimot. Ang kapunapuna ay ang di pagsipot pa ng komparsa.

—Kapitang Andoy, wala ba tayong tug-tugan?—ang usisa ni Labadre, ang kanina pa'y kantiyaw ng kantiyaw.

—Mayroon—ang tugon ng tinanong—Dalawa ang nangako sa akin.

—Saan po naroon?

—Hindi pa dumarating.

—Ika sampu na po ah?

—Maaga pa.

—Baka lawit ang púsod ng mga nangakong iyan!...

—Hindi po naman!—ang pagdaramdam na halo ni Beteng.

—Biro ko po lamang iyon. Patawarin ninyo ako—at tinapos sa halakhak.

Di na sumagot si Beteng at dumungaw upang tanawin marahil ang kanyang komparsa. Datapwa't wala siyang namalas at ni si Simon ay di sumisipot. “¿Bakit kaya?” ang naitanong sa sarili. Siya rin ang sumagot “Maaga pa naman.” At

naupong muli na ipinako ang malas kay Dolores.

—Kay ganda ng langit ko!—ang inipit na sigaw ng kalulwa. At mula sa ulo hanggang paa ay pinanooran niya, ang gumugulo sa kanyang buhay at pagkatao.

Si Dolores, kung talaga mang may katutubong ganda, ay higit at lalo pa noon. Batid niyang siya lamang ang magiging panoorin sa kasayahan, kaya bumikas ng dapat maging bikas. Ang damit na isinoot ay yaong talagang bagay sa kanyang ganda: kulay bughaw.

—Loleng—ang saad ni Labadre—kay dami mong kandidato ay wala na bang nagalay sa iyo ng tutugtog?

—Ayaw ko nga niyan!—ang yamot ng pinagukulan.

—Hindi ba?—ang patigas ni Labadre—may artista ka, may estudyante ka, may pintor ka, may...

—Mayroon ng lahat!—ang patalo ni Dolores.

Tawanan at titigan ang itinugon ng lahat. Siyang pagsipot ng anim na dalagang nagpapanagaw sa dilag. Ang gayak ay paraparang ternong bughaw. Yaon ay mga bituin ng “Kami Naman.”

Batian at kamayan ang nangyari. At naupo na naman ang lahat.

—Wala pa hanggang ngayon ang komparsa!—ang kantiyaw na naman ni Labadre, matapos magpausok ng tabako at makapagpaindayog sa kulumpiyó.

—Tanghali na nga ang dugtong ni kapitang Andoy.

—Sayang ang mga sandaling nakaraan!—ang patuloy pa ni Labadre.

Si Beteng ay parang iniinis. Nabaklatuloy na baka di na nga sumipot ang komparsa. Hindi na mapalagay ang binata. Dudungaw; uupo; tatayo; at lalabas na lamang ang gawa.

Ang mga bubuyog ay patuloy sa pakikipagbulungan sa mga bulaklak. Ganap na kaligayahan ang inaawit nila. Bawa't isa'y kinalalarawanan ng galak, tuwa, aliw.

May mga binatang palipatlipat ng upo. At may mga dalagang nagbabanalbanaan. May mga bagong taong bibig at matá lamang ang kumikilos. At may mga dalagang kamay lamang ang pinagagalaw sa pamamaypay. Ano pa't halohalo na: ang mabait at ang malikot.

Si Dolores man ay masayang masaya

rin. Samantalang si kapitana Martina ay lakad dito, lakad doon. Pumasok, lumabas, ang ginanap na tungkulin.

—Ano bang komparsa iyan?—ang di mapakaling bulas na naman nġ bibig ni Labadre—hanggang nġayon ay wala pa?...

—Antabayanan natin—ang alalay naman ni kapitang Andoy.

—Sus!—ang payamot na ni Labadre—sinasabi ko't lawit yata ang púsod nġ mġa nangako....

—Mang Beteng, anong oras po ba darating?—ang usisa na ni kapitang Andoy.

Pinawisan nġ malamig ang binata at matagal din bago nakasagot:

—Ang sabi ko po ay ika walo.

—Bakit wala pa hanggang nġayon?—ang lahók ni Labadre.

—Talagang gayon po tayong pilipino: pag sinabing ika walo ay antayin mo sa ika labing dalawa....—ang katwiran ni Beteng.

Samakatwid ay mamiya pa sila darating—ang pandidilat na ni Labadre.

—Malaking sisté!—ang yamot na ni kapitang Andoy—iPati si Artemyo ay nawala na ah!....

Nagbingibingihan si Beteng nġuni't.

naglalagablab ang loob. Ang poot niya ay kay Labadre nabubuhos. «¿Sino bang hayop ito?» ang tanong sa sarili. ¡Kay luwag ng kuwelyo! ¡Kay ikxi ng amerikana! ¡Tambakan yata ng basura ang bibig sa walang sawang pagnanga! Pausok ng pausok ng tabako at bibig na lamang niya ang naririnig. Sulot ng sulot sa kapitang Andoy na parang binubaeng gumigiri. Dapat nang kainisan ni Beteng. Kung hindi sa kanya, kay Labadre, ay di pa lubhang mainip ang ama ng kanyang Dolores.

—Kapitang Andoy,—ang pagitna na naman ni Labadre—kung batid ko lamang na walang tugtugan ay ako sana ang nagdala...

—Bakit po? ¿Wala po bang tugtugan? —ang usisa ng ilang kaharap.

—Mayroon—ang tugon ng kapitang Andoy—darating na.

—Sunduin ko yata?—ang putol ni Beteng.

—Huwag na po—ang pakunwari ni Dolores.

Ang sagot na ito ng binibini ay nakapagbawas din ng kaba ng dibdib ni Beteng. Paano't paano ma'y nakabuhay din

ng kanyang loob. Lubha pa noong pumasok si kapitana Martina na nagsabing:

—Loleng, samantalang wala pa ang mga komparsa, ay ilabas mo ang iyong alpá at aliwin mo ang iyong mga kaibigan.

—Siya nga po.

—Yaon ang magaling.

—Ang inaantay namin.

—Halana.

Gayon ang naging tugunan ng lahat na pawang nagpako ng malas sa dalagang ipinagbubunyi. Sa likod nito ay namaibabaw din si Labadre. Anya'y:

—Ilabas mo't marami tayong paaawitin dito. Hayan si Nitang, ang tiple sa Mandaluyon, si Berang, ang danġal ng Tangke, si Siyon ang buhay ng "Kumilos Tayo," at....

—Silang lahat na!—ang dugtong ni kapitang Andoy.

—Siya nga po, siya nga po—ang ayon ng mga binata.

—Bah! ibah! ibah!—ang pagtangga ng mga dalaga.

Ayaw pa sana si Dolores na ilabas ang kanyang alpá, dahil sa pagkatig sa kanyang mga kabaro, nguni't napilitan din.

Ilang sandali pa ang lumipas at nagdiwang na ang mġa daliri ni Dolores. Mahabang palakpakan ang tumapos.

—Talagang ang dalaga ni kapitang Andoy, ay madadala na sa esposisyon sa Panamá—ang pagpuri ni Labadre.

—Naman!—ang salo ni kapitana Martina at ni Dolores.

—Walang biro: ang mayaman sa ganda at mayaman sa talino, ay talagang pang-esposisyon—ang patuloy ni Labadre—Nġuni't.... ¿wala pa ang mġa komparsa?

Si Beteng na naman ang natisod. “iKulog na matanda ito!” ang bulong, “ihindi na napagod ang bibig!” Salamat at nagbago nġ salita si Labadre:

—Nitang, tiple nġ Mandaluyon, ikaw naman nġayon.

—Si mang Labadre naman—ang patumpik nġ pinagukulan.

—Halana; isang kundimang makalaglag matsing—ang pilit ni Labadre—Loleng, tugtugan mo.

Nagpalakpakan ang mġa panauhin, nġuni't si Nitang ay ayaw pa rin. Ang dalagang sibol sa langit nġ Pilipinas ay talagang gayon. May talino man ay hindi ipinagpaparanya. Bagkus ikinukubli ha-

ban napipita. Lalo na't pagpuri at paghanġa ang ipaghahalungkat.

Mana'y isang matining na tinig ang nagpatahimik sa lahat. Umaawit si Nitang at sinasaliwan ni Loleng. Si Labadre ay napatigil din. Sinamantala naman ni Beteng ang pagpanaog upang salubunġin marahil ang komparsa.

Sa panulukan nġ mġa daan Sagat at Penyapransiya, ay doon tumanaw si Beteng. Sarisaring guniguni ang lumaro na sa binata noong hindi niya mamalas ang inaantay. ¿Biniro kaya siya nġ komparsa? ¿Talaga kayang di na sisipot? ¿Ano ang ginawa ni Simon sa salapi? Ganyang mġa tanong ang di niya matugon. Nanġanġawit naman sa pagtanaw sa wala, ang kanyang malas.

Minsan ay magingġas ang poot kay Labadre. Kung wala ang taong yaon ay di gaanong mapupuná ni kapitang Andoy ang di pagsipot nġ komparsa. Ang kapitan ay nawiwiling makipagusap sa mġa panauhin. Datapwa't laging sinusulot nġ masalitang matanda. Ito ang nagpapalaki nġ sunog. Ang kanyang pagkatao ay nabinġit tuloy sa pilapil nġ kahihyaan.

Si Simón naman ang nahagilap ng alaala. ¿Pinagtaksilan kaya siya? Hindi mangyayari. Kagabi lamang ay ika labingisa na ng umalis sa bahay ni Beteng. At sinabi nitong naibigay niya ang salapi at tinanggap naman. ¿Saan naroon? Marahil ay tinitipon ang manunugtog. Walang sala; pagka't pina-inum pa niya ng herés, bago umalis.

Humakban ng ilan ang binata at idinukot sa bulsa ang kamay. Tumanaw na naman sa malayo, nguni't wala pa rin. "Mga tao na namang iyon, ¿di kaya inaalala ang kahihyan ko?" ang tanong na magisa. Tinanggap ang salapi at ¿di sisipot? ¡Malaking pagkukulang sa pagsasama! Datapwa't ¿ano ang magagawa ni Beteng? Siya'y nagaanyaya lamang. ¿Ang salapi? Yaon ay pabuya lamang. Iba ang upa sa pabuya. Kung upa, kahi't umulan ay sisipot sa takdang oras. Sapagka't pabuya, ay daratal kung kailan si-pagin. ¡Utang na loob pa!

Inip na inip na ang binata. Pumagitna na naman sa daan at muling tumanaw. Wala pa rin. Si Simon man ay walá rin. ¿Tuluyan na kayang mabibitin ang kaawaawa? Sumisikdo ang loob; suma-

sasal ang tibok ng puso; nangangapos ang hininga. ¡Mahirap na talaga ang mabingit sa kahihiyan!

Waring nabuksan ang langit kay Beteng nang marinig niya ang tunog ng bigwela. Walang alinlangang yaon ay kina kapitang Andoy. Halos ay tumakbo ang binata sa galak. Matulin na pumanhik. Lalong sikip na ang bahay na bago ng kapitan. Noon ay nagsasayawan na. Taas ang noo, lantad ang mukha, na dumulog sa harapang yaon. Nguni't ikay laking pagkabigo! Ang tumutugtog pala ay hindi ang komparsang kanyang inantay, kung hindi ang orkesta ni Artemyo at ni Pastor. Napipi at napamangha ang binata. Lalong ibinaon siya ng kahihiyaan. Malalamig na patak ng pawis ang umaliw sa kanya. Ang mata naman ng mga kaharap ay parang umuuyam sa kaawawa.

—Naito na pala si mang Beteng!—ang bulalas ni Labadre—ínahan ang inyong komparsa? ¡Wala! ¡Nilagpasan kayo ni Artemyo!...

Walang naitugon ni Beteng kung hindi sarisaring banta. Poot kay Artemyo, sapagka't napaibabawan na naman siya.

Galit kay Labadre, dahil sa lagi siyang hinihiya at ibinibilad. Ngítngít kay Simón at sa komparsa, sanhi sa siya'y isinubo sa kahihiyaan. Gayon ma'y nagbakasakali ring daratal. At pinilit ang ngiting nagsaad kay kapitang Andoy:

—Nahuli ang komparsa natin.

—Tanghali na nga—ang tugón naman ng pinagukulan.

—Nahan mang Beteng ang inyong komparsa?—ang pagitna na naman ni Labadre—¿mayroon ba o wala?

—Mayroon—ang salo ni kapitana Martina na noon ay abalang abala—Ito namang si Labadre, ¿hindi pa ba kayo nasisiyahan sa orkestang iyan?

—Bah! Iba po ang komparsa ni mang Beteng sa orkesta ni mang Artemyo—ang tugon ni Labadre.

Patuloy naman sa pagtugtog ang orkesta, at patuloy din sa pagikot sa sayaw ang mga bubuyog at bulaklak. Si Loleng naman at si Artemyo ang nag-sasarili; kaya lalong naglalagablab ang poot ni Beteng. Paano'y dinadarang ng panibugho. Gayon ma'y nagtatagumpay din ang dakilang asal. Nagkamayan din

ang dalawang binata. Kay Pastor ma'y parang walang ano mang bigat ng loob.

Natapos ang sayawan. Pumutok ang serbesa. Lalong namayani si Labadre. Datapwa't si Beteng ay parang nau-upos na kandila. Lahat ay nakamata sa kanya o kay Artemyo kaya.

—Malaking pagkabigo!—ang pagkakalat na naman ni Labadre—iNapeste na yata ang komparsa ni mang Beteng!

Halakhakan ang itinugón ng lahat. Ang binatang tinukoy ay maputlang maputla. Isang babai lamang yaong nakasagot:

—Si mang Labadre naman; itinatanghal ninyo ang lalaong dakila sa ating panauhin...

—Lalong dadakila kung sumipot ang komparsa—ang patlang ni Labadre.

—Sisipot din—ang pagtatanggol ni kapitang Andoy.

Walang imik at nakahalukipkip si Artemyo sa piling ni Pastor. Kapwa sila nagpapausok ng tabako.

—Sayang!—ang saad na naman ni Labadre—Mabuti, kapitang Andoy, at nagkaroon kayo ng isang Artemyo, disin ay nabitin tayong lahat.... iSa akin ay si

Artemyo ang lalong dakilang panauhin n̄gayon!...

—Salamat po—ang salo n̄ pinuri.

—Ehem,—ang tikim naman n̄ ilán na ginanti n̄ kindat n̄ ibáng nakababatid n̄ lihim.

Dadaluhingin na sana ni Beteng ang Labadreng kanina pa'y kinaliinisan na niya, kung hindi dumatal na humahanḡos at may dugo sa damit si Simón.

—Mang Beteng!—ang wika—iHumawak ka po n̄ patalim at ibanḡon natin ang iyong kahihiyan! iNarito ang umaagaw n̄ iyong danḡal! iAng isa ay napatay ko na!

—Ano ang nangyari? iSimón!—ang gulat na tanong ni Beteng.

—Kailanḡang pumatay ka po n̄ tao pagka't ang danḡal mo ay inaagaw n̄ iba!

Boong tapang na isinaad na labis na nakatulig sa lahat n̄ nakikinig. Si Beteng ay lalong naupos. Si Labadre man ay napipilan din. Maging si kapitang Andoy, maging si kapitana Martina, ay napako sa pagkamangha. Ang magandang Dolores ay nangliit sa takot. Sino ma'y

walang nakaimik. Isa isang minalas ni Simon ang panauhin. Hinanap ng kanyang mata ang mga kaaway ng kanyang katoto.

Sa gayong anyo, na lahat ay natitigilan, ay sumipot ang mga alagad, ng pamamayapa, ang kinatawan ng pamahalaan. Tinutok ng rebolber si Simon na:

—Bitiwan mo ang iyong patalim!

Binitiwan naman nito. Pinulot ng isa sa mga tiktik. Kinawit naman sa kamay ng isa si Simon. At magalang silang yumaon. Si Beteng ay sumama naman sa dinakip. At ang alingasnagas ay lalong naghari.

Isa't isa'y lumapit ngayon kay Artemyo at kay Pastor. Bala na'y nagusisa kung ano ang nangyari. Nguni't sa lahat ng tanong ay pawang «aywan» ang sagot. At yumaon na rin ang magkaibigan, matapos magpasintabi kay Dolores at sa lahat ng panauhin.

—Baka di na kayo bumalik?—ang huling tanong ni Loleng.

—Babalik; sandali lamang kami—ang tugón ng dalawáng nagmamadali.

Sarisaring hinagap ngayon ang naghari sa kasayahan. Bulong dito, bulong doon, ang nangyari. Si Labadre namay lumikha na ng kung ano anong mga hiwaga na singaw marahil ng alak.



VII

ANG PAGKAKATAONG LALONG MASAKLAP

HAPON na noon ng araw ni Loleng. Ang panauhin nila ay mga katulong na lamang. Ang pagsasaya ay natapos sa di oras, dahil sa sigalot na nangyari.

—Bah!—ang nasabi na lamang ni Artemyo nang siya'y dumating na lahat ay natatahimik. Ang durungawan man ng bahay ay nakalapat. Isa mang tao ay wala siyang mamalas. Tunog ng pinggan sa labas ang kanyang napupuna. Nag-alangnanin tuloy na magpatao' po. Subali't noong siya'y tatalikod na lamang ay nakarinig, ng:

—Mang Artemyo, tuloy kayo! ¿Ano po ba ang balita?

Ang kapitana Martina pala ang tuma-wag kaya't pumanhik ang binata.

—Bakit ngayon lamang kayo?—ang bati naman ni Loleng na buhat sa silid.

—Bakit naman nagkatapos agad?—ang usisa ng binata.

—Nagkasakit sa nerbiyos si Andoy—ang salo ng kapitana—Nariyan sa silid na binabantayan ni doktor Borlongan. Malubhang totoo.

—Diyata!—ang taka ni Artemyo.

—Nasindak kay mang Simon—ang patunay ni Dolores—Bakit talagang may sakit sa puso.

Ang nangyari po'y ganito—ang pagbabalita na ni Artemyo—Nangako rito, o kay kapitang Andoy, si Beteng ng komparsa. Ang komparsa pong yaon ay pinangangasiwaan ng isang nagnangalang Tomas. Si Beteng, upang matiyak na sisipot dito ang komparsa, ay nagbigay pa ng salapi. Si Simon po naman ang nagdala, sapagka't ito ang kasama ng Tomas sa hanapbuhay. Nagkasundo di umano sila, at tinanggap daw po ang pinakaupa. Nguni't kanina raw po ay

antay n̄g antay si Simon ay walang sumisipot. Hinanap daw po si Tomas at nakita sa bilyar. Inusisa raw po nito kung bakit di tumupad sa salitaan. Sapagka't si Tomas daw po ay napagtatalo ay di raw hinarap si Simon. Sa gayon ay sumubo na ang poot n̄g sumundo. Isang kung sino naman ang bumulong daw kay Simon na "talagang hindi sila sasama sa inyo sapagka't salitaang ibibitin kayo." Lalong nagdilim daw po ang isip ni Simon. Nagbunot na raw po n̄g kortapluma at nilabnot ang damit sa dibdib ni Tomas. "¿Sasama ka o hindi?" ang makapangyarihan daw na tanong. "¡Huwag ka n̄gang buwisit!" ang tugon daw naman ni Tomás, "¡Hayan ang salapi mo!" at inihagis daw po ang pabuya. Sapat na yaon upang si Simon ay gumamit n̄g patalim. Tinarakan na raw po sa tapat n̄g puso si Tomas...

—Hesus!—ang pahiyaw ni kapitana Martina.

—Di namatay?—ang saad naman ni Loleng.

—Mangyari pa po! ¿Di ba ninyo narinig ang hagibis n̄g ambulansiya?—ang tanong pa ni Artemyo.

—Narinig nga namin at siya tuloy nagtaboy ng maraming panauhin—ang saad ng kapitana.

—Bakit sinabi ni mang Simon kay Beteng na narito ang umaagaw ng kanyang dangal?—ang usisa pa ni Loleng.

—Ipinalagay po marahil nila na si Pastor o ako ang nagsulsol kay Tomas, na huwag sumipot.

—Patawarin ng Diyos!—ang saad ni kapitana Martina, at hinarap si Dolores—ipaghanda mo sila ng mirindal.

—Huwag na po. Marami pong salamat—ang maagap na pagayaw ni Artemyo.

—Hindi manyayari; kakain at kakain kayo—ang pasya ng kapitana.

Si Dolores nama'y yumaon na upang ipaghanda ang irog. Ilang sandali lamang ay magiliw na nagsabing:

—Tayo na.

—Huwag na po—ang pasalamat ng binata.

—Hala na—ang yaya naman ng kapitana.

Sa kapipilit ay tumayo rin si Artemyo. Silang tatlo ay nagharap sa lamesa. Sumungkit si Dolores ng mantikilya at ipinahid sa tinapay ng binata. Nilagyan naman ng kapitana Martina ng keso ang

pinggan nito. Nguni't noong isusubo na lamang ni Artemyo ang biskuwit na isinahok sa mainit na sikulate ay nabigla sila sa tawag na:

—Kapitana! ¡Kapitana! ¡Dolores! ¡Dolores! ¡Madali kayo at mamamatay na ang kapitan!...

Madaling gumibik ang tatlo. Unahang pumasok sa silid ng kapitan. Isang higit na lamang ng balik at ang kanilang namalas, at:

—Patay na!—ang saad ng doktor.

Malakas na hagulhol ng magali ang nagbalita sa boong kabahayan, ng masaklap na pagyaon ni kapitang Andoy. Dumagsa sa silid ang tao mula sa labas. Madlang kapitbahay ay nagsidalò rin.

Samantalang nagsisitangis halos ang lahat, si Artemyo ay pagal na pagal namang inaaliw ang kanyang pinopoon. Sa pagkahandusay sa isang upuan ni Loleng, ay boong giliw niyang pinapaypayan. Pinipisilpisil ang mga daliri at hinahaplos ang mukha. Walang malay naman ang dinaklot ng pighati.

Ilang sandali pa ang lumipas at tinanghal nang bangkay, ang kanikanina lamang ay tinawag na kapitang Andoy.

Sa isáng silid ay nagkulóng na naglapat ng pinto ang magali. Mula roon ay umalingawngaw ang malumbay na pagtangis nila sa dagok ng palad.

¡Kay saklap na naging kaarawan ni Loleng! ¡Nagsimula sa galak at natapos sa mapait na pagluha! ¡Sawing palad na pagkakataon!



VIII

MGA NALUGMOK SA LIWANAG NG BUWAN

GABING maligaya. Ang buwan noon ay parang nabibitin sa langit. Nagpapalalo ng kanyang yaman. Sa daan Sagat naman noon, ay magulong maguló ang mga bata. May tubigan, may taguan, at kung ano-ano pang laro ang ginaganap. Nakikipaglamay sila sa liwanag na kaayaaya. Noon ang ika pitong gabi ng dasal na patungkol kay kapitang Andoy. Kaya't kung sino-sinong manang at manong ang nagsisidatal. At lalong marami ang dalaga at binatang mga kaibigan ni Dolores.

Ang masamyong halimuyak ng mga *dama-de-notse*, sa halamanan ni Loleng,

ay sumusuob noon, at bumabati sa mga alindog na panauhing patungo sa dasal. Ang mga panggabing paroparo, o mga pusong palaboy ng pagibig, ay naglisaw naman sa daan at inaabangan ang kanikaniang bulaklak. ¡Sayang nga naman ang pagkakataon!

Mula naman sa langit ay nagkislapkislap ang mga hiyas ng kalawakan. Mga bituing waring nagsasaad na *sinusubukan namin kayo*. Hangin lamang marahil ang nakababatid ng kanilang isinasaloob.

Mana'y tatlong lalaki ang sa daang Erran ay waring nagaaliw na naglalakad. Sila ay si Artemyo, si Pastor at si Labadre. Makikipagdasal ding gaya ng mga sinundang gabi.

—Hiyanghiya siya noon—ang saad ni Labadre—wala pa kayo ay talagang iniinis ko na.

—Bakit naman?—ang salo ni Artemyo—baka tuloy isinaloob na tayo ay magkakasapat.

—Maano yaon?—ang sabad ni Pastor.

—Hindi—ang matwid ni Labadre—Batiid naman ng lahat na tayo ay di pa magkakakilala noon.

—Kung sakali man ay sa pangalan lamang—ang lagot ni Pastor.

Lumiko sila sa daang San Tiyaġo.

Magtapatan nġa tayo—ang hamon ni Labadre—ano ang ikinagalit ninyo kay Beteng?

—Galit kay Beteng!—ang pagtataka ni Artemyo—Ni sa guniguni ay wala akong galit sa kanya. Pilitin ko man yata ang mapoot ay di mangyayari.

—Sus!—ang di paniniwala ni Labadre.

—Talagang totoo kaibigan.

—Ako ang magtatapat—ang agaw ni Pastor—Bakit ba ako magbubulaan?

—Hala nġa—ang sambot ni Labadre.

—Ang masama ay dapat bungkalin—ang patuloy ni Pastor—Ang magtakip sa isang kasamaan ay ginagawa lamang nġ mga taksil.

—Siyang totoo—ang ayon ni Labadre.

—Sapagka't kami ay hindi taksil ay sasabihin ko ang katotohanan—ang dugtong pa ni Pastor—makasama o makabuti man sa amin.

—Iyan ang lalaki!—ang pagpuri ni Labadre.

—Hatulan mo:—ang simula na ni Pastor.

—Si Beteng ay dinaig nito sa pangi-

n̄gibig kay Loleng. Dahil doon ay sari-saring paninirá ang kanilang inasal. At pati ako ay binantang sapakatin. N̄guni't di pumayag ang puso ko. Nabigo ang kanilang amuki. Sila ni Simón ang nagkasundong mabuti. Ako naman, palibhasa'y di maamin n̄g aking sarili ang pagagaw n̄g dangal nito, ay siya ko namang inagapayanan. Hanggang sa loob n̄g Samahang «Kumilos Tayo» ay nagpanagupa kaming mabuti. ¿Doon ba naman ay sukat alisan n̄g tungkol at itiwalag ito?...

—Hindi lamang yaon—ang putol ni Artemyo—inilathala pa sa m̄ga pahayagan na ako raw ay magdaraya, magnanakaw, at. . . .

—Si Beteng ba o si Simón ang naglathala?—ang tanong ni Labadre.

—Si Beteng; nakalagda pa eh—ang patuloy ni Pastor—Ang nasapit ay nabagsak ang Samahan. Paano'y maraming nagsitiwalag at dinamdam ang nangyari. ¿Biro ba ninyong kahihiyan, yaon?

—Siya n̄ga—ang ayon ni Labadre.

—Mula na noon—ang dugtong ni Pastor—ay inabatan ko na siya. Inabatan

ko, ako lamang, sapagka't ito ay ayaw makipatol.

—Bakit makikipatol ay napapabuti na siya?—ang biro ni Labadre.

—Hindi naman—ang n̄giti ni Artemyo.

—Nang mabalitaan ko ang araw ni Loleng—ang giit din ni Pastor—ay nilakad ko ang komparsa ninyang inanyayahan upang huwag sumipot. Sa mabuting salita ay di lamang pumayag na sila ay di sisipot, kung hindi nangako pang sa amin sasama. Datapwa't inakala kong pangit ang gayon. Kaya pinaurong ko ang kanilang pagparoon, at humanap na ako n̄g orkesta...

—Ah! ¡Labis ang pagkaganti ninyo!—ang hatol ni Labadre—¡Malakas na sampal ang inyong ginawa! ¡N̄guni't.... patas na kayo!

—Nakalalamang pa kami—ang habol ni Pastor.

—Mangyari pa! sa sa inyo tumining ang pagpuri n̄g lahat—ang ayon ni Labadre.

Noon ay na sa tapat na sila n̄g tahanan ni Betong. Madilim ang bahay at wala ni kalatis mang marinig. Tahimik namang lumagpas ang tatlo. At lumiko sila sa daang Sagat.

—Kumusta naman kayo ni Loleng?—
ang usisa na naman ni Labadre—Banta
ko'y nakasapit na kayo sa lupang pa-
ngako...

—Malayong malayo—ang tugon ni Ar-
temyo.

—Ang turo ko sa kanya—ang dugtong
ni Pastor—ay pagkaraan ng dasal sa na-
sirang kapitan ay umaklás na sila...

—Bakit pa aaklas?—ang tanong ni
Labadre—Magpamanhikan na lamang at
ako....

Hindi natapos ang pananalita ni La-
badre, at sunodsunod na, bumulagta ang
tatlong magkakasama. Isang lalaki ang
nanampalasan. Saksak dito, tarak doon
ang ginawa. Nangakatimbuwang na'y
di pa tinirahan ng búhay. Sa isang san-
dali, ito ay naganap. Bago napakilala
yaong mamamatay:

—Ako'y si Beteng! iSi Silbestre Santos!
iAng lalaking isinubo ninyo sa kahihi-
yan! iWala akong ginawa kun di mani-
ngil! iAko na rin ang hahanap ng ka-
tarungan!.....

Inihagis ang hawak na balaraw. Yu-
maon ang lalaking naghiganti. Nilisan sa
liwanag ng buwan ang tatlong bangkay.

Ang ulo ni Artemyo ay napatong sa dibdib ni Labadre. Si Pastor naman ay nakabulagta sa may dalawang dipang layo. Ang dugo ng mga sawi ay parang idinilig sa pook ng sakuna.

—Tatlong bangkay!

—Inutás si Artemyo!

—Sino ang pumatay!

—Pinatay si Labadre!

—Hinarang!

—Tinapos si Pastor!

Ganyang mga alingawngaw ang sa ilang saglit lamang ay gumulo na sa bayan ng Pako. Ang tao sa mga sine, ay unahan ng paglabas. Maging mga pulis ay gulonggulong. ¿Ang dasal pa kaya kina kapitana Martina ang hindi naligalig? Naligalig din. Naligalig ng gayon na lamang. Takbuhan sila sa pagpanaog.

—Ay!—ang buntong hininga ni Loleng, nang mamalas niya ang bangkay ng kanyang giliw at nagunahan nang pumulas ang luha...

Ang kahihuyan ay sinupil ng pagibig. At ang lakas nito ay namayani na naman noon. Niyakap ni Dolores ang bangkay ni Artemyo. Inihiga sa kan-

yang kandungān. Luha naman ang itinulong ni kapitana Martina. At lahat ay nagtaglay ng habag sa busabos ng pagibig; kay Loleng na nagtanghal ng di karaniwan sa mata ng madla. Mabilis na umaagos ang kanyang luha, na nagbabansag ng matayog na kadakilaan ng kanyang puso, at magtatanghal ng taimtim na pagdaramdam ng kanyang kalulwa.





[IX

BALIW NA NAGSASABI NG KATOTOHANAN

WARING m̃ga salarín na hinahakot ang m̃ga manglilimbag sa limbagan ñg Pamahalaan, at dinadala noon sa pagamutan ñg San Lásaro. Dahil sa pagkamatay ñg isang kasama, sa sakit na *dipterya*, ay muntik ñg ikulong ang lahat ñg kawani sa boong limbagan. Kuwarentenas diumano ang kailangán, sa-pagka't mapangganib na sakit ang *dipterya*. Ang mikrobyo raw noon ay totoong mabisang makahawa. Ganyan ang pasya ñg matatalinong doktor sa Kagawaran ñg Karunungan. At naganap ang pasya, бага man kay daming anak ñg dalita ang napinsalaan.

Lungkot, pighati, hinagpis, pamamanglaw, iyan ang lumalaro sa m̃ga kaawaawa na ikinulong sa isang kamalig na na ni lamok ay di makapasok. May tumatangis at may tumatawa. Datapwa't... ¿ano pa? Pagtangis na inililihim at pagtawang pilit lamang. Ang iba'y malungkot na inaalaala ang asawa. Ang iba'y iniluluha ang m̃ga anak. At ang iba nama'y mapanglaw na ginugunita ang kanilang pinopoon sa buhay, ang langit ñg kanilang pagibig. Kung minsan sa hinagpis na iay! ay buntong hiningang iay! din ang tugon....

At ¿bakit di sila mamamanglaw? Tunay; sila'y malalakas pa kay sa humakot sa kanila. Paano'y wala namang sakít. Subali't ang pagkawalay sa m̃ga pinakamahal sa buhay, ang masabing sila ay may mikrobyo ñg *dipterya*, ay labis nang makapanglumó ñg puso. Isa lamang dito ay sapat nang sumupil sa kanilang lakas.

Noón ay isang hapon mapanglaw.

Salamat sa pagdalaw ñg ilang m̃ga kasama at kamaganak ay nababawasan ang kanilang lungkot.

Salamat din naman sa m̃ga alaala ñg

“Kami Naman”, na paano’t paano ma’y ikinaaaliw nila. Ang masasarap na bis-kuwit, welga, at sigarilyo, na abuloy ng Samahang yaon sa Pako, ay nakatutugon din kahi’t bahagya sa kanilang hapis. Paano’y tanda yaon ng pagmamahal; pagmamahal na ibinuyo ng pagibig; at pagibig na likha ng banal na pagkakapatiran.

—Ano ang naisipan ng “Kami Naman” at nagpadala rito ng abuloy?—ang tanong ng isa.

—Wala. Tumupad lamang sila sa kanilang tungkulin. Dumamay sa kapatid—ang paliwanag ng nakasalaman.

—Tayo ba’y kapatid nila? ¿Hindi naman tayo kasapi?—ang patlang ng iba.

—Oo. Kapatid nila tayo; kasapi man at hindi sa kanilang Samahan. Sapagka’t ang mahihirap ay magkakapatid na lahat. Kung paanong ang mahirap ay walang bayan, ay gayon din na walang lipi. Bayan niya ang Sangsinukob at lipi niya ang Sangkatauhan....

—Tama!

—Mabuhay!

—Katwiran!

Ganyan ang itinungon ng ilan at tinapos sa palakpak na pagpuri ng lahat.

—iMga kapatid!—ang malakas na hiyaw na kanilang narinig.

Natahimik ang lahat. Sila'y nagsidulog sa durungawan. At mula roo'y napanood nila kung sino ang sumigaw. Isang baliw sa kulungan ng mga sawing palad. Na sa bahay na katapat ng kanilang kinapipiitan. Mula sa durungawan noon ay isang talumpati ang binigkas sa kanila:

—Mga kapatid: Itigil ninyo ang pagawit ng galak. Ang dapat magalak ay ang nasisiyahan sa buhay. Samantalang tayo ay naghihikahos: gipit sa lahat ng kailangan; dahop sa salapi; uhaw sa paglaya; ay pawang pighati ang ating dalitin... Sapagka't, sapagka't, sapagka't siyang bagay sa ating kalagayan....

—Katwiran!—ang bulungan ng mga nakikinig.

—Makinig tayo!—ang saway ng ilan.

—Sa buhay na ito ng mga pangarap—ang patuloy ng nagtatalumpati—ay talagang pawang katiwalian ang malimit mapanood. Ang mahirap ay nasisiyahan sa kanyang kahirapan, nguni't ang mayaman ay di nabubusog sa kanyang kayamanan. Gayong ang dapat mangyari ay

masiyahan ang masalapi sa kanyang kasaganaan, at dumaing ang dukha sa kanyang kadahupan. Subuking iwasto ang lakad nġ buhay: tumahimik ang mayroon; magsigasig ang wala: at ang puso nġ maralita ay hindi na tatangis...

—Totoo—ang turing nġ ilang nakikinig.

—Makamahirap pa!—ang paghangġa nġ iba.

—Bayan ko—ang hiyaw na naman nġ baliw—¿Kailan pa mapapanatag ang iyong kapalaran? ¿Habang panahon na ba ang iyong pagtitiis? ¿Talaga bang isinumpa ka sa kaapihan? ¿Bakit di ka kumilos? ¿Ano ang kabuluhan nġ iyong lakas? ¿Walang kalayaang inililimos! ¡Ang ipinamimigay ay ang kalabisan nġ nagbibigay! Ano pa't ang layang inaantay mo, ay iang labi nġ panginoon! Datapwa't alalahanin mong may mġa labi, na ni hayop ay tumatangġi.... At ang bayang labi nġ kapwa bayan, ay mahina. ¡Walang kasinghina! Marupok. ¡Walang kasingdupok! ¡Parang salamin lamang! ¡Sayang ang iyong matatalino! ¡Sayang ang iyong matatapang! ¡Masdan mo't isa isang nagsisitulog sa libingġan! ¿Bakit di mo samantalahin ang kanilang lakas? Kung ang

tao ay sumipot upang makipagagawan sa buhay, ang bayan ay nilikha upang makipaglaban sa karapatan....

—Iyan ang ulol na nagsasabi ng katotohanan!—ang pagtataka ng mga nakikinig.

—Sino kaya iyan?—ang tanong ng iba.

Ang baliw naman ay lalong gumilas sa paglalahad ng mga nangyayari. Kumuha ng pisi at sa dulo'y itinali ang kanyang panyolitong puti. Inilawit sa rehas. Binayaang iniwagayway ng hangin. At malakas na sinabing:

—Hayan ang watawat ng pagsuko! Hayan ang sagisag ng pananahimik! Batiin ninyo at igalang. Mahalin ninyo at ibigin. Kung iyan ang ating ilaladlad sa gitna ng digmaan ay unahan tayo ng paghawak. Datapwa't kung pula, tanda ng paglaban, ay nagtuturuan tayo. Magdarayang tapang!...

Sandaling natigilan. Bago nagpatuloy:

—Bandila ng kapayapaan! Ang kapangyarihan mo ay nagdidiwang sa ibabaw ng maliit at api. Nagdidiwang, sapagka't nasisiyahan sila sa kanilang kaaliitan at kaapihan. Datapwa't sa malalakas at manglulupig, ang kapangyari-

han mo'y hindi makapamayani. Hindi makapamayani, sapagka't di pa sila nabubusog sa kanilang tayog at kadakilaan. Dapat lumaganap sa lahat ang iyong lakas. Masupil mo nawa ang sangkatauhan!...

Noon ay papaalis na ang mga dalaw. Nang mapuna ng baliw ang pagyaon ng ilang dalaga, ay maliksing hini-git ang kanyang watawat. Nagpugay sa mga paalis, na anyay:

—Paalam mga dalaga ng lahi, masam-yong bulaklak ng bayan. Dahil sa in-yong dilag ang libo mang buhay ay ipasasawi. Si Plorante'y naging Plorante dahil kay Laura; si Ibarra'y naging Ibarra dahil kay Marya Klara; ako naman ay magiging ako dahil sa kagandahan ninyo. Paalam mga pangarap ng aking puso. Taglayin ninyo ang alaala ng in-yong sawing lingkod....

—Malambingin pa—ang saad ng isang nakikinig.

—Parang hindi ulol—ang pasya ng iba.

—Siya nga—ang ayon ng ilan.

Nagpatuloy naman ang baliw; nguni't iba na ang uri ng isinasaad. Ang tinig man ay tinig panambitan na:

—Loleng n̄g buhay ko! ¡Dolores ng aking kaluluwa! Halika't pawiin mo ang lungkot n̄g iyong alipin. Dahil sa kagandahan mo, tampok n̄g pagibig, ako ay naging mamamatay. ¡Limang buhay ang inutang ko!...

At naghinagpis n̄g:

—Ay, kapalaran! ¡Napakadilim n̄g gabi na aking nilalamay! ¡Nakamatay ako sa di kinukusa! ¡Kaibigang Artemyo, katotong Pastor, kasamang Labadre, m̄ga kulang palad na naparamay sa aking kasawian!... ¡Simón! ¡Simón! ¡Simón! ¡Huwag kang mahapis diyan sa bilibid! ¡Ang pagdurusa mo'y tanda n̄g iyong pagkamatapat na katulong! ¡Sa gaya mo, buhay man ay maipagkakatiwala!... ¡Ang kayamanan ko'y manahin mong lahat!... At magdiwáng ka n̄g boong galak...

Nilagot ang salita sa halakhak. Nagpatuloy pa rin:


—Ako si Beteng! ¡Si Silbestre Santos! ¡Limang buhay ang aking inutang! ¡Apat ang inutas ko n̄g patalim at isa ang namatay sa takot sa aking ginawa! ¡Kay Tomás ay ako ang pumatay! ¡Hindi si Simon! ¡Palayain ninyo siya! Si Simón ay kinasangkapan ko lamang sa pagpa-

tay. ¡Si Tomás ang unang tinampalasan, nġ marahas kong loób! ¡Kay Artemyo, kay Pastor, kay Labadre, ay ako rin ang pumatay! ¡Si kapitang Andoy man ay namatay sa pagkasindak sa sakuna! ¡Ano pa't dahil din sa akin! ¡Oo; inaamin kong limang buhay ang aking utang, kaya't ako na rin ang humanap nġ kata-runġan!...

At tinapos ang talumpati sa:

—¡Pagibig! ¡Pagibig! ¡Itangis mo ang mġa sinawi nġ iyong lakas at kapangyarihan!.... ¡Dalaga! ¡Dalaga! ¡Alalahanin mo ang mġa nalugmok dahil sa iyong kagandahan!...





X

SA LAOT NG HAPIS

TUMATAKAS na noon ang tuwa at marahang humahalili ang lungkot. Ang ilaw nã sangdaigdig ay sumisibsib na noon sa kalunuran. Iba't ibang bikas at kulay nã ulap ang napanood sa kaitaasan. Samantalang sa lupa ang tinig nã panglaw ay namamayani na. Datapwa't lumalo pa sa looban nila Dolores, doon sa halamanang kinakitaang natin sa kanya noong siya'y nagaaliw at nagpapalipas nã isang mapanglaw na hapon. Oo; doon ay lumalo pa ang lungkot; paano'y naroon si Dolores at dinidilig nã patak nã luha ang kanyang alagang mga tanim.

—Ay!—ang buntong hininga—iKay saklap nġ buhay!...

Tinutop nġ dalawang palad ang kanyang mukha bago nagpatuloy:

—Halos kahapon lamang ay kasalo at kaulayaw ko ang aking Ama, nġayon ay na sa langit na... iKay pait gunigunihin!

Tinapos sa isang masaklap at malalim na *lay!*... Ang perlas na luha ay nag-uunahang bumalong sa mġa malas nġ kaawaawa at sa di kinukusa ay napa-tanaw sa kaitaasan.

—Langit, oh, natunġong langit... Kung turan nġ mġa makata, ikaw ay maawain. Kung sabihin nġ mġa maralita, ikaw ay mapagkandili. Nġuni't ang kato-tohanan ay inagaw mo ang boo kong kalwalhatian. Wala kang inalabi sa akin kung hindi isang pusong nalulunod sa hapis at isang pagibig na nabibilibid nġ mġa himutok. Sa ganap na pangunġulila ay tinatawanan mo ako, nġayon...

At tumunġo, tunġongtunġo, na sa masidhing pananaig nġ lungkot ay napasandig sa puno nġ kamuning. Noon ay may isang ibong nagparinig sa kanya nġ lalong mapapanglaw na dalit. Sa puso ni Dolores ay lalong nagugat ang lumbay.

Paano'y nagunita niya ang mġa awit ni Artemyo, si Artemyong artista, ang kanyang kapapanaw na giliw.

Lumakad ang ulilang kalulwa at dumulog sa kanyang mġa sampagitang noon ay naghahandog nġ kawiliwiling bangō. Isa isang hinagkan nġ nalulungkot na dalaga.

—Kayo, kayong mġa sumaksi sa lihim nġ buhay, kayong naging aliwan nġ aking giliw, halana, halana, aliwin ninyo ang ulila sa lahat nġ kaligayahan... At tayo'y magsalong magalaala sa kanya...

Marahang pinuti ang mapapalad na bulaklak. Sa lumang luklukan ay malungkot na naupo ang dalaga. Dito naglaro sa kanyang isipan ang lalong maligayang dahon nġ kasaysayan nġ kanyang buhay sa pagka binibini. Hinalungkat nġ kanyang alaala ang hapong pagtatalik niya sa galak. Noon ay araw nġ Huwebes. Siya at si Artemyo ay kapwa pinalaya nġ palad. Ang kanyang ali ay nakatulog yata sa pangginge. Doon nġa, sa halamanang yaon, at sa luklukan ding yaon, sila ni Artemyo ay lihim na sumumpa, sa harap nġ kanilang dangal at sa nġalan nġ kanilang pagkatao. Ang

mga puso nila ay kapwa ipinasulat na maging busabos at ipinakilalang panginoon din naman. Ano pa't noon niya binitiwang ang «oo» ng kanyang pagibig. At noon din siya pinangakuan ni Artemyo ng lalong matamis na pagmamahal. Sa ikapagtitibay nito, ay isinanla sa kanya ang isang singsing na hanggang ngayon ay nagniningning pa sa kanyang mga daliri.

—Singsing ng giliw ko! ¡Kaputol na ginto at batong nagniningning! ¡Hiyas, na tanging pamana sa akin, ng aking panginoon at buhay! ¡Lalong nadudarog ang puso ko, kung mapanood ka ng aking malas! ¡Ang nakaraan ay ipinatatanaw mo at ibinabalik mo ako sa aking kahapon! ¡Sa langit ka na tutubusin ng nagsanla sa iyo!...

Tanda ng pagkalunos sa hiyas ng kanyang kasi, ay magiliw na hinagkan ito. Kaya itinirik ang mata sa kalawakan at waring hibang na kinausap ang bumihag sa kanyang puso:

—Artemyo, bayaan mong alalahanin ka ng nagmamahal sa iyo...

Noon ay nagsipotsipot na sa kaitaasan ang mga hiyas ng gabi, ang mga brilyante

n̄g malapad na lambong n̄g dilim. At sa gitna n̄g gayong kalungkutan, sa pamamayani n̄g alingawn̄gaw, ay m̄ga piping hibik na *ay!* ang waring nahihingin̄an. Yaon ang hinagpis n̄g pusong sapupo n̄g sakit, ni Dolores na di na mabata ang pait na ipinalalasap sa kanya n̄g palad...

Kinabukasan, sa libingan sa Singgalong, ay dalawang babai ang pumasok. Pusong busabos n̄g pighati, kalulwang alipin n̄g hapis, ang kanilang dala. Kapwa luksangluksa, nagbabansag n̄g sakit na nilalasap n̄g buhay. Marahang nagsisilakad at nakatun̄gong tulad sa m̄ga banal. Sila ay si Dolores at si kapitana Martina.

Si Dolores? Oo. ¡Si Dolores! Si Dolores Balderrama; ang tala sa daang Sagat sa Pako, dalagang nakabighani sa maraming pusong palaboy n̄g pagibig. N̄guni't hindi na siya si Dolores na laranan n̄g ganda; hindi na siya ang bituing kalaro n̄g kaligayahan. Siya n̄gayon ay si Dolores na nagpipighati; ang dalagang yapus n̄g matinding biro n̄g kapalaran.

Si kapitana Martina ang kasama? Oo. ¡Ang kapitana Martina! Ang mahal na asawa n̄g nasirang kapitang Andoy. Datapwa't hindi na siya ang kapitanang

mapagsiste: matandang sa lagi na'y masaya. Siya ngayon ay babaing sapupo ng lungkot, matandang ulila sa galak.

Oh, panahon, kay dali mong magbago ng anyo!

Noon ay hapon napakalungkot. Sa libingan ay ganap na nagdidiwang ang pananahimik. Pamamanglaw lamang ang doo'y nakapangyayari. Ang mga krus na tanda ng patay ang tanging tanod ng mga nagpapahingalay. May mangilang ibong nagsisihuni, nguni't ano pa? huning nakapagdadagdag ng lungkot sa mga ulila ng pinakamamahal.

Lumapit sila sa libing ni kapitang Andoy. Inilagak ang ilang bulaklak ng biyoleta, na dinilig muna ng luha. Doon ay naiwang tumatangis si kapitana Martina na pinagyayaman ang libing ng buning kapitan.

Si Dolores ay doon naman lumuhod sa harap ng krus ni Artemyo. Ang bulaklak na dala bago inilagak ay hinagkan muna. Nauna pang pumatak ang mga luha ng kaawaawa.

Kay lungkot na panoorin!

—Artemyo!—ang wika—iBayaan mong sa iyong pananahimik ay paminsanmin-

sang alalahanin ka, n̄g pusong di naka-
lilimot! ¡Naging sawi ka man sa iyong
palad, ay dakila ka naman sa alaala n̄g
iyong iniwan! ¡Diyan na! ¡Diyan na sa ba-
yang payapa awitin natin ang tamis n̄g
pagibig!... ¡Ang kapalaran ay di matu-
tulan!...

At sa pisin̄gi n̄g dalaga ay marahang
umaagos ang m̄ga patak n̄g luha; m̄ga
luhang pangalaala...

¡Kay tamis n̄g kamatayan kung gayon
ang pagmamahal n̄g mauulila!...

WAKAS



KUROKURO AT PANSIN

NI G. HONORATO H. DE LARA

Sa matalino at mayuming Bbg. Fausta Cortes.

Marangal na binibini:

Matapos ko pong mabasa at manamnam ang unang supling na ito ng inyong makisig na panulat; matapos kong mapagukulan ng mahabang pagwawariwari, ay agad ko pong isinakamay ang aking pulpol na panitik upang boong ingat na panalaytayin ko sa maputing papel ang napakalaki ninyong napithaya sa dahop kong kaya na katigan ng mga panghuling kurokuro ang napakamahalagang aklat ninyong ito, ang AGAWAN NG DANGAL, na handang iyalok sa lalong may pihikang panlasa, palibhasa'y pagkaing luto sa inyong sariwa at mayamang isipan.

Datapwa't, ipaano po kaya ang aking gagawin, marangal na binibini, upang makayari ng isang tunay na *epilogo*?

¿Purihin ko na lamang po kaya ang pagkaing ito, at sabihin kong masarap, at sagana sa mga kailangang sangkap, kahi't na may nalalalahan akong *anghang* at *pait*?

!Inaakala ko pong hindi wasto ang gayon!

Sapagka't ayon din po sa pasiya ng isang bantog na *polemista*, kilalang mangangatha, tanyag na mananagalog at datihang mamamahayag na si *Inocencio Dilat* (humigit kumulang) na, hindi anya kailangan ng isang *epiloguista* ang sabihing ang aklat na ito (halimbawa) ay mainam, may dakilang layong mag-alis ng piring sa mata ng hangal, may maningning na mga pangungusap, sagana sa mga palaisipang malalim, busog sa mga pantas na pagkakuro at mayamang mayaman sa pananagalog na tabas Balagtas, sapagka't anya'y isang kalabisan. Ang isang *epiloguista* ay katulad din anya ng isang *critico*, magpasiya at turulin ang isang bagay na kamalian, bago suriin at hatulan, alalaon baga'y punahin ang mali bago itumpak atilagay sa dapat kalagyan.

Nguni't... ito nga kaya ang tunay na *epilogo*? Iyan ang hindi ko mataya!

Datapwa't... para kay *Inocencio Dilat* ay ganiyan, ganiyang ganiyan.

At... ipalagay na po nating ganiyan na nga. Punahin ko ang lahat ng kamalian; sabihin kong namimilipit ang inyong mga pangungusap; minsang mada-pilok sa paglalarawan ng lalong mga kailanang ibadha ng inyong panitik; may mga pangyayaring madilim, malabo;

may m̃ga bigkasing kayong hawig sa wikang kastila ó ingles, ó ang gayon at ganito ay di mangyayari, anopa't ang lahat ñg kamalian ay isa-isahin kong turulin, suriin, punahin, bago itumpak, at... iwan ang dapat suubin ng kamaniyang, ang dapat purihin, ang dapat itampok sa lalong napakatayog na karangalan, alalaon бага'y sabihin kong *mapakla* at *hilaw* ó kaya'y *mapait* at *maasim* ang inyong ipinalasap na ito sa ating m̃ga mambabasa, gayong ang katotohana'y, sa kabila naman ñg lahat ñg iyan ay mayroong nalalalahang tamis, sarap, linamnam, ay... ano po kaya ang wiwikain ninyo sa akin?

¿Hindi po kaya mangunot ang inyong noo at sabihin na ako'y masamang *epiloguista*, kung *epiloguista* na ñgang matatawag kahi't birobiro ang abang kaliitan?

Oh!... kay laki ñg inyong napita; pagkalakilaki... At sa kalakhan, ay hindi ko po tuloy matutuhan kung paano ang aking gagawin upang mapaunlakan ko kayo sa inyong hiling

Sapagka't... ang wika nga po ñg isang mangwawagi't bantog na makata at balitang manlilintang sa napakatamis na wikang ginamit ñg ating haring si Balagtas, sa kanyang walang kamatayang *Florante at Laura*, na si *Itang Balbarrin*, na tubo sa mapalad na libis ñg bundok ñg Samat, na siyang kinakitaan

niya ng unang liwanag ng araw, na: ang isang *epiloguista* raw po ay hindi dapat mamuna ni maglahad ng ano-mang tuntunin sa pagsulat, sapagka't, ang isang *epiloguista* ay kaibangkaiba anya sa isang *critico*.

¡May matwid!

At, kung ganito nga ay... ¡paano po kaya ang dapat kong gawin o saan landás ako tutungo upang makayari ng isang wastong panghuling salita?

Para kay *Inocencio Dilat* ay di wastó ang ganito...

At, para kay *Itang Balbarin* naman ay lalong di tumpak ang gayon.

¡Alin kaya ang dapat paniwalaan sa kanilang dalawa? ¡Kay laking suliranin!

At... sa suliraning iyan ay para ko pong nakikinikinita sa dalawang bantog na manunulat na iyan, na darating ang isang pagkakataong maguunawaan din sila; pagtatapisin ang kapwa nila matwid sa pamamagitan ng pagpipinkian ng kanikaniang mga panitik sa larangan ng digmaan ng literaturang tagalog.

Nguni't samantalang tayo po'y nag-iintay at upang ako'y makatupad sa inyong napithaya ay wala po akong ibang gagawing batayan sa *epilogong* inyong hinihingi kundi, ang sinabi ng kataastasang Pangulong Wilson, na, anya'y: *justicia y nada mas justicia*.

Sa makatwid ay wala kayong sukat maintay sa akin, maraṅgal na Bbg. Cortes, kundi ang dalawang bagay: purihin ang dapat purihin, at, punahin ang dapat punahin.

* * *

¡Kurokuro!

Ang aklat mo pong ito, Bbg. Cortes, ay isang aklat na tanṅi sa may layong mag-alis nṅ kulaba sa pangmalas nṅ mṅa hangal, magakay sa lalong may bulag na pagkukuro, nakapagtuturo pa rin sa ibang kadalagahan, diyan sa mṅa dalagang dahil sa kinang nṅ salapi nṅ sa kanila'y mamintuho, ay nalilikhang sapilitan ang pag-ibig at di inaantay ang kusang tibok nṅ kanilang puso.

Sa loob nṅa nṅ AGAWAN Nṅ DA-NGAL ay parang namumalas ko pa hangga nṅayon ang animo'y mga larawang buhay na nagsisigalaw: ang magandang Dolores; ang mapalad na si Artemio; ang mapag-sisting si kapitana Martina; ang antukin at matatakuting si kapitang Andoy; ang mabuting tao, nṅuni't masamang kristianong si Simon; ang matapat at walang kasingbuting katoto, ang may diwang Tasio, sa Noli ni Rizal, na si Pastor; ang mapagpansin na si Labadre; at... ang nakatatawang pagkahuli ni kapitana Martina sa isang batang sisilipsilip nṅ nag-aagahan na si Beteng, yaong si Beteng na wa-

lang tanġing ipinanġahas mula't mula pa kundi ang kanyang kayamanan, ang kanyang pilak, sa panġingibig sa mayuming si Dolores, na siyang gumanbala nġ kanyang isip, diwa't pagkatao.

Ang nakakapanaghiling kapalaran nġ artistang si Artemio, si Artemiong kapangpanġan, ang wika nġa ni Beteng, yaong si Beteng na hindi makapaglakbay sa lupang panġako, kundi may kasama; hindi makapitas nġ ibinabawal na bunġa nġ *mansanas* kung walang hagdanang matutungtungan, ay maging mabisa sanang *tampal* at matinding *hagupit* sa ilang mġa lalaking kung walang tulay ay di makapanġibig sa isang himala nġ ganda, sa isang *Venus*.

Si Dolores, ang kapatid na bunsong ito, ni Maria Clara, sa *Noli Me Tangere*, ni Meni, sa *Banaag at Sikat* ni Celia, sa *Florante at Laura*, at ni Ligaya sa *Kristong Magdaraya*! ay pinaglupaypay ninyo ang matigas na puso sa darang nġ maalab na pag ibig; pikitmatang pinatalaktak ninyo sa kaharian ni *Kupido* at pinahintulutan din ninyong magpamalas sa masinsing tabing nġ pagkukunwari sa kanyang hinahanġaan binata, sa umagaw nġ kanyang pananahimik: kay Artemio.

At talagang ganyan nġa po ang dapat ninyong gawin, maranġal na binibini, upang magkaroon nġ *naturalidad* ang isang pangyayari na, hindi gaya nġ iba na-

ting mangangatha na sa pagnanasang huwag masinagan ng bahagya mang gaspang ang isa sa mga kumakatawan ng kanilang aklat, na sapagka't binigyang na nila sa una ng mga *character* na mahinhin, mayumi ay pakapipilitin patain o inisin ang itinitibok ng puso.

At upang patotohanan kong minsan pa sa inyo, na talagang hindi kamalakmalak na mangyari ang inyong ginawa na sa kahinhinan at kayumián ni Dolores ay paibabawin ninyo ang kagaspangang nililikha ng pag-ibig ay ipahintulot ninyong sipiin ko rito ang matwid ng ating Balagtas sa kalakhan at kadakilaan ng ating tinutukoy:

Oh! pagsintang labis ng kapangyarihan sampung magaama'y iyong nasasaklaw, pag ikaw ang nasok sa puso nino man hahamaking lahat, masunod ka lamang.

¿Ano ang nangyari kay Beteng?

Humigit kumulang na sinasabi sa aklat ninyong ito, na siya, si Beteng ay wala ng sinikap sa gabi't araw o sa lahat ng sandali, kundi ang ikalulukso ng dangal ng umagaw sa kanyang langit, sa kanyang paraluman. At, di nga inak-saya ni Beteng ang mahabang panahon at karakarakang isinagawa. Inanyayahan isang araw ang dalawa niyang kaibigan, si Simon at si Pastor at isinangguni ang kanyang maruming nais; datapwa't anong tiwaling pagtitiyap at sa

isip at diwa nitong huli, kāy Pastor ay itinanim ninyo, ang damdaming Delfin, ang pusong Felipe sa "Banaag at Sikat" ng makatang Lope, na sa harap ng matalim na upasala at marungis na adhika ni Beteng, ay di ninyo pinapagtagal ang puso ni Pastor, pinapanalag ninyo sa mga ulos at taga ng mga kaway na lihim ng kanyang kaibigan.

At sunodsunod ninyong isinabibig ni Pastor ang ganitong pangungusap, sa tulong ng kanyang dilang walang pangimang magsabi ng katotohanan:

"Mga kaibigan, huwag ninyong hamakin ang kanyang lahi. Kapangpanan man at tagalog ay iisa ang uri, at ang sumira ng pag-iisang iyan, ay yaon ang taksil na dapat pangilagan. Ang taong pumapatay ng pag-dadama-yan ng pilipino ay yaon ang kalaban ng bayan. Ang kaluluwang nagtatanim ng pag-iirangan ay siyang uod na sumisira ng laya at pag-asa ng lahat".

!Anong ningning ng pagkukuro ni Pastor!

At... nakaramdam ng kirot ang dalawang pinagsabihan...

"Hindi mga kaibigan—ang ganti ni Pastor—kailan ma'y di ko magagawa ang sumugat sa kapatid. Nguni't, oo; makikipaglaban ako sa kanino mang magbibinhi ng pag-iirangan. Ang buhay ko'y aking itinataya lubha pa't ang pag-iiri-

n̄gan ay ipupunla dahil lamang sa inggit sa isang lalaking kinakandong n̄ palad..."

“Ilang kaya sa m̄ga kababayan natin, Bbg. Cortes, ang makapagtataya n̄ buhay sa pagtatanggol n̄ matwid n̄ isang tao?

“Kay dakila n̄ inyong paghahaka!

Matapos magpaalaala ang baliw na si Beteng kay Pastor, na ito’y nasa ibang bahay, ay para ko pang nakikininitang nakan̄giti at hantad ang noong sumagot:

“Sa bahay na pinaghaharian n̄ dilim ay doon ko dinadala ang ilaw”.

Pagkatayogtayog po n̄ kurokuro ninyong ito, Bbg. Cortes, nasa pamamagitan n̄ kaunting salita lamang ay halos niyayanig ninyo ang budhi n̄ mapagdunongdunungang m̄ga hangal.

Ang dalawang katalo ni Pastor ay lalo ninyong pinagpuyos ang kapootan.

Ipinagtabuyan si Pastor, n̄guni’t pangiti ring sinabi:

“Dapat ninyo akong itaboy; dapat ninyo akong turang ulol; sapagka’t ang gurong nagtuturo ay talagang kalaban n̄ m̄ga musmus na tinuturuan”.

Sa harap n̄ ganyang maigting na pagwawariwari ni Pastor, ay tahasang masasabi ko Bbg. Cortes na ang inyong baguhang panitik ay karapatdapat maisapiling n̄ lalong m̄ga tanyag at dakilang m̄ga manunulat natin, sapagka’t

minsan pa ninyong ipinakilala ang mataos ninyong paggalang at pagmamahal sa wastong matwid.

Si Pastor ay nilakipan ninyo ng kislap ng sosyalismo ng mga banal na aral ni Tolstoy, Jaires at iba pa, na, siya ninyong nais matutuhan ng ating mga kababayan.

Kusa kong iniwan at babayaan na, marangal na binibini, ang nakaiinggit na lambingan ng dalawang pusong bihag ng pagibig: si Dolores at si Artemio. Hindi ko na po paguukulan ng kurokuro ang kadalisan ng puso ni Dolores na hindi maalam masilaw sa kinang ng salapi at sa hibo ng kisig. Kusa pong di ko na gagalawin o paguukulan pa ng mga wariwari ang kasiglahan ng handa sa kalarawan ni Dolores, maging ang kasanyan ninyang tumugtog ng alpa; maging ang kalunoslunos na hinangganan ng masayang handaan sa bahay ng ating dalaga; ang di ninyo paglimot sa paglalarawan ng mga kagandahan ng mga bituin ng "*Kami-Naman*" na dumalo sa naturang kasayahan, palibhasa'y ang lahat ng iyan ay inaasahan kong sapat nang makapagudyok sa lahat ng makababasa ng aklat na ito, upang putungan kayo ng walang katapusang pagpupuri.

At, kung alinalin ang aking isasakururukan ng lalong kapurihan?

Wala pong iba Bb. Cortes kundi ang kinawilihan kong mga paghahaka ni Pas-

tor, na busog na busog ng pagibig sa kanyang mga kababayan, at... ang mga pangungusap ng baliw na si Beteng ng siya'y napipiit na.

Sa ikaapat na kabanata, sa pangkat na naglalarawan ng boong pagsisigasi ni Pastor, sa pagdamay sa kanyang kaibigang Artemio at sa harap ng mga manunugtog na ipagpaparangal ni Beteng ay natunghayan ko na naman, matapos ang ilang paliwanag ang lalong dakilang kurokuro ni Pastor:

"Narinig na ninyo—ang saad ni Pastor na linawin natin: hindi raw dapat bigyan ng tungkulin ang isang dapo. Katwiran, nguni't bakit nila natitiis ang mga dapong naghahari sa ating bayan? at dapo ba si Artemio? Ano kung kapangpangan siya? Hindi ba pilipino rin? Maaari bang magsarili ang tagalog na ang kapangpangan ay hindi? Napakarupok na pagkukuro! Ang masasabi ko'y nakikilala ang dapong kapatid din nila, datapwa't hindi nila nakikita ang tunay na dapong dito'y tumawid. Ngayon at kalahi ay halos sakmalin. Nguni't kung maputi kahi't na lumapastangan, ay nginingitian din. Sinusurot, dinuduro at pinamumukhaan ang kabalat sbali't ang dayo ay saka lamang mamura kung nakatalikod".

Kay sakit mo pong susugat Bbg. Cortes. Nguni't inaakala kong kailangan ngang ang mga bulok at uod na makasisira sa

mabulas na pagkakaisa ay isa isang lasunin. ¡Patain!

¡Magbinhi nawa ang inyong magandang adhika!

Sa gitna ng pagtataka ng hindi mabilang na mga manggagawa sa bahay palimbagan ng pamahalaan na nakuwarentenas dahil sa sakit na di umano'y *dip-terya*, sanhi sa pakakapag-abuloy sa lahat, kasapi at di man ng malusog na Samahang *Kami Naman* ay para ko pang nariringig magpahangga ngayon ang matalinghagang mga pangungusap ng isang ulol na sagana sa mga katotohanan.

At sa wakas ng kanyang maniningning na sinabi, sa huli ng kanyang mga pangarap sa sinasapit ng ating bayang, at pagkakaagwat ng kapalaran ng mayaman sa mahirap, ng pagkakalayo ng mahirap sa mayaman, ay di ko malirip magpahangga ngayon po, Bbg. Cortés, kung bakit naisipisipan ng ulol na si Beteng ang maglawit ng isang panyo at bago sinabi ng makita niyang pinapas-pas na ng hangin:

“¡Hayan ang watawat ng pagsuko!
¡Hayan ang sagisag ng pananahimik!
Batiin ninyo at igalang. Mahalin ninyo at ibigin. Kung iyan ang ating ilaladlad sa gitna ng digmaan ay unahan tayo ng paghawak. Datapwa't kung pula, tanda ng paglaban, ay magtuturuturuan tayo. ¡Magdarayang tapang!”

Subali't sino kaya ang pinatatamaan ng ulol na si Beteng?

Kundi ako namamali, ay walang iba kundi ang ibang mga kababayan nating inatatapang sa bibig nguni't wala sa gawa.

!Napakasasakit na pangungusap!

Ang aklat mo pong ito, Bbg. Cortés, ay inaasahan kong sa kahalagahan ng layunin ay magiging isang bagong tipan na ikapagbabago ng likong kaugalian ng marami. Mga pansin:

Bbg. Fausta Cortés: Itulot mo po naman ngayon na ilahad ko ang aking mga puna.

Tulad sa akin ng sinabi, na hahalunkatin ko't ibubunyag ang dapat purihin at ukol punahin, ngayon ay magtatapat ako sa aking pangungusap.

At, magsimula tayo.

Pagkarinig ko ng pamagat ng aklat na ito na AGAWAN NG DANGAL ay kumilos na sa aking guniguni ang larawan ng pag-aagawan sa katungkulan ng ilang kapatid nating araw-araw ay nagbabangay. Inakala ko na't hinulaan na yaong pag tutunggali ng mga taong gumugulo sa ating bayan ay siya ninyong pinuna. Ang isip ko'y humula ng dalawang pangyayari, at boong boo ang aking pananalig na hindi sasala sa alin man sa dalawa kong akala, ang inilahad ninyo. Kung hindi ang nakahihiyang pag-aagawan sa karangalan ng ating mga politico

ay walang salang ang ligalig sa mga halalan ang inyong tinuligsa. Ganyan ang boo kong sapantaha at marahil ay siya namang sasapantahain ng iba. Datapuwa't ikay laking pakakamali! iAgawan pala ng dalawang puso sa isang pain ng pag'ibig! Hindi ko po sinasabing malayo ang pamagat sa laman. Hindi po, sa pagka't nalalaman kong may mga taong iba ang pangalan sa asal. Lamang ay ipinagtatapat kong sumala ang aking hula.

Sa lahat ng dahon ng AGAWAN NG DANGAL ay pawang makabagong pananagalog ang aking napuna. Sa kaba-guhan ay mayroong mga talatang nagkapilipilit ang pagkasalaysay. Aywan ko lamang kung sinalyang pinaikot ng masiglang panulat ninyó, Bbg. Cortes.

¿Kung alin alin? Na itó po:

“Ang magandang tabas ng mukha ay napapatungan ng maiitim na buhók”.

Paano po kaya ang bikas ng mukhang yaón? iNapapatungan ng maiitim na buhok! iIna ko, kakilakilabot! Marahil ay sumusunong ng maiitim na buhók at di napapatungan. (Maalaala ko pala.) Hindi rin masasabing sumusunong at lalong hindi napapatungan; sapagka't labas na si Dolores ay panot, paano'y sunong o nakapatong lamang pala ang buhok...

Iba naman:

“..... sinungkit..... ang mantekilya.....”

¿Sinungkit? ¿Baka po kinahig? At kung ang *sinungkit* dito ay hindi mali, ay huwag naman kayong tumawa na sabihin kong “n̄ginalot ang tubig.”

Isa pa:

“Tumayo sa mesa.....”

¿Tumayo sa mesa? ¿Saan tumayo: sa ibabaw po ba n̄g mesa? ¡Sus! ¿Si Dolores, ang mayuming dalaga, ang kaluluwa n̄g kasaysayang ito, ang tatayo sa mesa? Hindi mangyayari. Bakit noon ay kasalukuyan pa namang sila’y nag-aagahan. Baka mayroon pang lalong tumpak na masasabi ang Bbg. Cortes, ay siya sana nilang ginamit.

Ganito at iba pang gaya nito ang sinasabi kong m̄ga nagpapandanggong pana nagalog na makabago.

* * *

Pagtutuos:

Anhin ko man pong punahin ang m̄ga katangian n̄g dakilang panulat ninyo, binibining Cortes, ay lagi ring nananaig sa aking diwa at isipan ang m̄ga banal na layuning tinutun̄go n̄g inyong akda. Ang m̄ga pansin na aking pinuna ay nagiging parang guhit na itim lamang sa isang malapad, matibay, marilag at napakapinong habi na niyari n̄g inyong bago n̄guni’t magiting na panitik. Anopa’t nakapagdadagdag lamang n̄g kainaman ang mangilangilan ninyong bagong ayos n̄g pananalaysay, sa mahalagang aklat.

At upang patotohanan ay napapakagatlabi ako sa katalinuhan ninyo na makapagsabi ng:

".....ang mahihirap ay magkakapatid na lahat. Kung paanong ang mahirap ay walang bayan, ay gayon din na walang lipi. Bayan niya ang Sangsinukob at lipi niya ang Sangkatauhan....."

Sa inyong matataas na isipang iyan ay kabilang ako sa mga humahanga at hahanaga sa inyong panulat.


At talagang marunong kayo sapagka't marunong kayong magpahesus sa inyong aklat. Niwakasan ninyo sa taimtim at kalugodlugod na pagmamahal ni Dolores kay Artemio. Sinabi pa ninyong:

"iKay tamis ng kamatayan kung gayon ang pagmamahal ng mauulila!..."

Ako man po, Bbg. Cortes, ay makapagsasabi rin at talagang nais ko na rin ang mamatay kung may isang Dolores na tatangis sa aking pagyaon....

HONORATO H. DE LARA.

Taga "Ilog-Beata."




KASAYSAYAN

NG

“KAMI NAMAN”





AKLATAN ÑG "KAMI NAMAN"

BAKAS ÑG SAMAHAN

Ó ANG UNANG

BAHAGI ÑG KASAYSAYAN ÑG

"KAMI NAMAN"

(SAMAHAN ÑG MAHIHIRAP)

SAPUL SA PAGKATATAG
HANGGANG SA WAKAS ÑG
PAMAMAHALA NI G. A. DE
LOS REYES

SINULAT NI

Bb. GORGONIA DE LEON

IKA APAT NA AKLAT
ÑG AKLATAN ÑG




(1915)

AKLATAN ÑG "KAMI NAMAN" 1045, DAANG ANAK NG
BAYAN (Dating "CREMATORIO"), PAKO, MAYNILA, K. P.

PAUNAWA

Ang aklat na ito ay nilimbag sa dalawang ayos: nilimbag na kalakip ng "Agawan ng Dangal" at nilimbag na may sariling balat ó takip. Sino mang mag-nais na magkaroon ay makabibili sa mga bilihan ng aklat dito sa Maynila, sa halagang isang peseta (P0.20). Ang mga na sa lalawigan ay makapagbibilin sa Aklatan ng "Kami Naman" sa halagang kahati (P0.25) Ipalilimbag din ang pangalawang bahagi at magtataglay ng mga larawan; gaya ng larawan ni G. Apolonio Umping, G. Paulino Centeno, at iba pang may halaga sa "Kami Naman".



G. Francisco V. Dizon

Ang nagtatag ng "Kami Naman" at
naging unang Pangulo ng
Samahang ito.

(Tunghayan ang dahong ika 3)

BAKAS ÑG SAMAHAN

O ANG UNANG BAHAGI ÑG KASAYSAYAN ÑG

"KAMI NAMAN"

(SAMAHAN ÑG MAHIHIRAP)

SAPUL SA PAGKATATAG HANGGANG

SA WAKAS ÑG PAÑGUÑGULO NI

G. ANGEL DE LOS REYES.

Sinulat ni Bb. Gorgonia de Leon.


NOON ay ika 25 ñg Agosto ñg 1912. Sa umagang yaon ay isang panahong tagulan ang nagsinan ñg mña taga Pako. Ang liwanag ñg ilaw ñg sangdaigdig ay di mang makagitaw sa makapal na ulap sa pangonorin. Nabigo ang mña ibong sa tuwing umaga'y nagpupuri sa bagong liwayway. Walang nasisiyahan sa mña sandaling yaon kung hindi ang mña bulaklak na nagpapakasawa sa ulang hindi tumitila. Noon nasiyahan ang kanilang uhaw. Ilan kayang puso't kalulwa ang sumusumpa noon sa panahon dahil sa pagkapinsala ñg kanilang tipan?

Datapwa't nagmasungit man noon ang panahon, ay may isang binatang nagtatanghal ñg kanyang kagitingan. Siya ay si G. Francisco V. Dizon, kawal ñg bagong kabihasnan. Siya ang lalong nagsikap na magsabog ñg liwanag ñg araw ñg sigla ñg kabataan sa nayon ng Sapote sa Pako. Ang ulan ay di niya ikina-

balino, bagkus sa pamamagitan ng isang payong ay isa isang sinusundo ang kanyang mga kaibigan upang magtulongtulong sa pagbalangkas ng isang Samahan. Ano pa't walang alinlangang dapat sabihin na utang sa kanya ang kilusang yaon ng kabataan.

Sa isang tahanan sa nayon ng Sapote, Pako, Maynila, ay doon nagkatipon ang ilang magkakapanalig. At sa pangungulo nga ni G. Dizon, ay sumipot sa silong ng langit ng Pilipinas ang isang bigkis ng kabataang pilipino. Sa mungkahi ni G. Luciano Suarez ay bininyagan ng "Kabataang Sikat". At, palibhasa'y pawang tinitibukan ng isang pusong uhaw sa dunong at aliw, ang mga nagkakatipong yaon, ay «magpalakas at magpatalino» ang pinagsaligan ng pagkabuo ng Samahan. Aralan ang mga pinagkaitan ng ilaw ng dunong at aliwin ang mga ulila sa ligaya, iyan ang tanging layon. At sa gayon ay nayari ang balak ni G. Dizon. Dapat alalahaning kinabukasan ng araw na yaon, ay siyang ika-26 ng Agosto, araw na napakaningning sa dahon ng kasaysayan ng Pilipinas, sapagka't siyang araw ng unang pag-sigaw ng kalayaan ng bayang api ng kapwa bayan.

Nang sumunód na Linggo, unang araw ng Septiyembre, ay nagpulong na muli ang mga nagsisigasig sa pagbangon ng "Kabataang Sikat". Sa mungkahi ni G.



G. Amado Jacinto

Naging Pangulo ng Samahang "Ma-
pagsikap" sa Malabon, Rizal

(Tunghayan ang dahong ika 19)

Angel de los Reyes, ay binago ang pamagat at pinalitán ng “Kami Naman”. “Kami Naman” ang ipinamagat, sapagka’t sa ibabaw ng kalansay ng mga samahang nabuwag na, ang ibig sabihin ay “*Kami naman* ang magtutuloy ng layong itaguyod ang buhay ng mahihirap sa tugatog ng dangal”.....

Katulad din ng ibang mga Samahan at Kapisanan ay inabot ng sakit na *ninãas-kugon* ang “Kami Naman”. Salamat sa ilang matatalinong manggagamot at ang sakit ay naihanap din ng lunas. Baga man ang “Kami Naman” noon ay para ng bangkay na malamig, dahil sa pagpapabaya ng ilan, ay muling sumigla. At noong ika 19 ng Oktubre ng taong 1912 rin, ay nagbitiw ng tungkulin si G. Francisco V. Dizon at si G. Angel de los Reyes ang napahalili, na naging Pangulo ng Samahan.

Ang bagong pangasiwaan ay nagpahayag noon din ng bagong palakad at binago na pati ng layon ng “Kami Naman”. Boong puso namang pinagtibay ng lahat at sinalubong ng magiliw na palakpakan.

Ang mapanglaw na daing ng mahirap, ang malungkot na taghoy ng api, ang malumbay na hibik ng mahina, iyan, iyan ang nagbukas ng bagong isipan sa puso at diwa ng bagong Pangulo. Binago nga ang dating saligan ng Samahan. Ang layong *magliwaliw* at *magpatalino* ay dinagdagan ng *pagdadamsyan*. Sa

gayon, ay hindi pawang kabataan lamang ang yumakap sa "Kami Naman", kung hindi sampu ng may mga gulang na ay nakitulong.

"Buhayin ang naghihingi ng alang pagkakapatiran" ang naging saligan na ng "Kami Naman". At ang naging pananalig ay "Ang hirap ay bunga ng kapabayaán, at na sa tiyaga ang pagtatagumpay".

Kapalaran mandin ang siyang sumubaybay sa bagong pangasiwaan at ng sumunod na Sabado ng pagkahalal sa kanila ay nagtanyag na ng kanilang di karaniwang lakas at magagawa. Sa bahay paaralan sa daang Dart, Pako, ay ginanap ang pagtatanghal ng Samahan. Sa lamayang yaon ay may apat na raang tao ang dumaló. Ilang matatalino at litaw na mananalumpati ang nagpaningning sa pagdiriwang. (Ang buong tala ng kasayahang yaon ay matutunghayan sa pangalawang aklat ng Aklatang "Kami Naman" na *Tuntunin ng Pulong*.)

Dahil sa bagyong nanalanta sa Sebú noong Oktubre ng 1912, ang "Kami Naman" ay nagsimula ng pakikisama sa bayan. Binahaybahay na tinawagan ang maawaing pusó ng pilipino sa Sapote, at lumikom ng isang halagang iniabuloy sa mga nasawi. At dahil sa pagkamatay ng ilang angkan ng mga kanayon na kapwa anak-dalita, ay dumulog na naman ang "Kami Naman" sa bahaybahay upang



G. Aurelio Tolentino

Bantog na mandudula, matalinong manunulat at matapang na mamamahayag. Sa larangan ng pananagalog ay kinikilalang isa sa mga may mataas na uri at may tanging pananalaysay. Siya ang kumatha ng dulang "Bagong Kristo" na nagtamo ng isang gantingpalang panyulat na ginto. Siya rin ang lumikha ng bantog na dulang "Kahapon, Ngayon at Bukas"; dahil sa kagitingan ng dulang ito ay pinilit siya ng Pamahalaang Amerikano. Siya ang sumasagot kung ano ang unang aklat ng Aklatan ng "Kami Naman"

abuluyan ang kapatid na dinatnan ng palad. Dapat talastasing ang mga unang inabuluyan ng "Kami Naman" ay mga taong ni ayaw man lamang makiyakap sa Samahang ito.

Sa ikapapaanyo ng damayan ay bumalangkas ng mga batas na susundin ng magkakapatid; at mula ng unang araw ng Disyembre ng 1912 ay nagsimula sa pagiral. Marami rin ang mga namatay at namatayang mga kapatid. Sa malinis at maselan na pangangasiwa ng Ingotyaman si G. Dario Malonzo, lahat ay pawang tumanggap ng abuloy na narapat. Walang nabinbin sa kanyang karapatan, bagkus ang lahat ay pawang nagtamo ng nauukol sa kanila sa lalong madaling panahon.

Dumatal ang ika 30 ng Disyembre ng 1912, araw na ipinanginilin ng lahat ng pilipino. Ang "Kami Naman" at ang nayong Sapote ay nagtuwang sa paghubunyi sa lalong dakilang taga Silangan. Nagdaos ng isang dulang hayag, nagkaroon ng tugtugan, nagilaw ang boong nayon at nagtayo ng mga arko. Ang lalong kapunapuna ay ang pagiisa ng nayon na pawang parol ng "Kami Naman" ang ginamit. At natapos sa ganap na kasyahang loob ng lahat. Ang salaping lumabis sa pagdiriwang ay inihandog sa "Kami Naman" ng kapulungan ng nayon, na parang ganting pala sa maayos na pangangasiwa sa pagdiriwang.

Sumunod na ibinunsod ng Samahan ay ang balak ni G. Marcelino Dizon na lumikom ng isang kusang ambagan upang ibili ng kasangkapang pang-apula ng sunog. Nakatagpo ang balak na ito ng mga balakid at binaka ng ilang di nasisiyahan. Gayon man ay pinangatawanan din ng Samahan at nakabili rin ng mga palakol at timba na magagamit karakaraka sa isang simula ng sunog. Hanggang ngayon ay nakatanghal at nakahanda ang mga kasangkapang ito sa nayong Sapote.

Ang munisipyo ng Maynila ay siya namang hinarap ng "Kami Naman". Sunodsunod na daing at kahilingan ang iniharap upang ang nayong kinatatayuan ng Samahan ay ipaayos. Pinilit na maglagay man lamang ng gripo, sapagka't noon ay nagkakahalaga ng anim ó limang sentimos ang bawa't dalawang timba ng inumin sa pook na yaon. Bihirang linggo ang walang panawagan sa pitak ng pahayagan sa Maynila. At humangga sa paglalagay mga ng gripo at pagtatakda ng pamahalaan ng apat na libong piso sa ikaaayos ng nayon. Ito ang lalong malaking tagumpay na tinamo ng "Kami Naman".

Upang iligtas sa sakit ang mga kanyon dahil sa malabis na paglulusak sa pook ng Sapote, ang "Kami Naman" ay nagtayo ng mga tulayang kawayan sa tulong ng nayon.



G. Honorato H. de Lara

(Tunghayan ang dibong ika 21)

Nang hakutin ng mga sanitaryo ang mga kawani sa Limbagan ng Pamahalaan at kulungin sa Pagamutang San Lasaro, dahil sa mikrobyo ng dipterya, ang "Kami Naman" ay siyang tanngi at kusang umabuloy sa mga napinsalaang yaon. Wala ni isang kasapi sa "Kami Naman" na napalahok doon, datapwa't ginawa ang pagdamay sa paniniwalang magkakapatid na lahat ang mahirap. At ito'y tinugon ng di gagaanong pasalamat ng mga dinamayan. Noon ay Marzo ng 1913.

Sa gayong mga ipinakisama ng "Kami Naman" sa bayan ay marahang sumusunog ang kanyang kabantugan. At lalo pang nabantog siya pagkatapos ipagbunyi ang ika isang taong buhay ng Samahan. Paano'y dalawang araw na ginawa ang kasayahan: ika 13 at ika 14 ng Septiyembre ng 1913. Nagbukas ng timpalak ng mga dula at gilasan ng artista, na siyang kaunaunahang timpalak na may ganitong uri na idinaos sa sangkapuluang Pilipinas. Nagdaos pa ng isang misang alaala sa lahat ng mga kasaping nangamatay sa ilalim ng watawat ng "Kami Naman". Nagkaroon ng binyag at kumpil at maghapon ng mga palaro. Ang nabantog na banda ng Meralko ay siyang tumugtog. At tinapos ang kasayahan sa isang magiliw na salosalong kapatid. Alinsunod sa mga pahayagan dito sa Maynila ay mahigit na apat na libong

tao ang dumalo sa m̃ga pagdiriwang na yaon. Dapat namang magkatotoo, pagka't may m̃ga nagtayo pa ng̃ m̃ga tindahan at lahat halos ng̃ tahanan sa Sapote ay may kanikanyang handa. Ano pa't ang pagdiriwang ng̃ "Kami Naman" ay naging parang pista ng̃ nayon. Sapul na noon ang "Kami Naman" ay nabantog na ng̃ gayon na lamang at ang lalong nakatawag sa diwa ng̃ marami ay ang m̃ga kartelong nagsabit sa trambiya na nagbansag ng̃ kasiglahang ipamamalas ng̃ "Kami Naman".

Ang isa pa sa m̃ga pagdiriwang ng̃ Samahang ito na hinangaan din ng̃ madla ay ang pagtatanghal ng̃ m̃ga "Bituin" ng̃ "Kami Naman". Ginanap noong ika 21 ng̃ Disyembre ng̃ 1913, sa Dulaang Angel sa Singalong. Mahigit sa tatlong libong tao ang nanood. At noon ay minsan pang itinampok ang mayamang uri ng̃ m̃ga babaing pilipina.

Sa m̃ga pamamahayag ng̃ bayan ang "Kami Naman" ay palaging nakikilahok; ng̃uni't pakikilahok na di sa gayongayon na lamang, kung hindi pakikilahok nakapunapuna; yaong nakapagpaparingal at umaani ng̃ papuri. Kung walang karrosa ang "Kami Naman" ay nakalulan naman sa sasakyan ang kanyang m̃ga kinatawan. Datapwa't hindi sa iisang sasakyan lamang kung hindi sa pito o labing apat kaya. At sa loob ng̃ dalawang taon ay labing dalawang ganting pala ang



G. Rosendo S. Cruz

Kumatha ng "Tuntunin ng Pulong"
na ikalawang aklat ng Aklatan
ng "Kami Naman"

(Tunghayan ang dahong ika 19)

tinamo ng "Kami Naman". Ano pang sigla ang hahanapin? Ano pang kilos ang magagawa? Wala na. Hanggan diyan na lamang talaga ang isang samahan.

Kasabay ang pagsisigasig na magtamo ng lalo at lalong karanġalan, ang "Kami Naman" ay nagpapakatatag sa kanyang tayo. Inakala ng Pangulong De los Reyes na ang pagkakaibaiba ng hilig ng mga kasapi ay dapat tapatan ng kanikanyang ikasisiyang loob. Dahil dito ay binahagi niya ang "Kami Naman" sa iba't ibang Lupon na may kanikanyang uri, layon, pananalapi, at mga kaanib.

Ang unang Lupon ay ang Damayan. Magabuloy sa namatay o namatayang kasapi ang layon. Lupon sa Kalakal ang pangalawa at nagsimula ng pagkilos noong Pebrero ng 1913. Disyembre ng 1913 itinatag ang Lupon ng mga Bituin na binubuo ng pawang mapanghalinang binibini. Sila ay mga kasaping pangdanġal sa "Kami Naman". Disyembre ring yaon ng itatag ang Lupon sa Pagpapalakas. Bago sumipot ang masikap at masiglang Lupon ng mga Manunulat.

Lahat ng lupon na ito ay nagtanghal ng kanikanyang lakas at magagawa. Bawa't isa'y naghandog ng matatayog na papuri sa boong Samahan. At sa lubos na paghanġa ng isang kasapi sa "Ilog Beata" sa kakisigan ng "Kami Naman" ay tinula niya ang kasunod:

"KAMI NAMAN"

Bayang inaapi, ako'y nananalig
na ang bawa't sikat ng araw sa langit,
taglay ang tinig mong malungkot na tinig.
At iya'y hindi ko matalos kung bakit
ikaw'y lumuluha, ikaw'y tumatangis
gayong may lakas ka't may Bayaning Bisig.

* * *

Subali't hintay ka; aking ibubuhay
ang isang alagad na dapat asahan.
Lumíngon ka roon, sa dakong Timugan
at mamamalas mong na nawawagayway
ang isang Bandilang kapitapitagan
ng kilala't bantog na ang KAMI NAMAN.

* * *

Yao'y Kapisanang sagana sa lahat,
sagana sa dunong, sagana sa lakas
at hindi marunong matakot sa tawag
ng kanyang kalabang mayaman sa gilás,
pagka't alam niya't kanyang natatatap
na ang Mundong ito'y Mundo ng pangarap.

* * *

Isang Kapisanang ang bawa't kasapi
ay may siglang taglay na kahilihili:
isang Kapisanang ang hakbang ay laging
tungo sa pagsulong, tungo sa lwalhati:
sapagka't ang kanyang darakilang Mithi'y
itanggol ang api: matwid ay maghari.

* * *

Yao'y binubuu ng dukha't mayaman
ng mangmang at paham, bata at may gulang,
sapagka't ang kanyang isang patakaran
na salig sa loob noong Kapisanan,
ang dukha'y ibangon, ang aba'y tulungan,
wala ni mataas; pawang pantaypantay.



G. Ramon S. Torres

Kalihin Tagapahayag ng Samahan ng
mga mananagalog na "Ilog Beata"
at tumula ng tulang
"Kami Naman"

At, ito'y tulain ng mga makata,
dakila sa lalong Samahang dakila,
maningning sa lalong maningning na tala;
at sapagka't ito'y butihing diwata,
ako, ikaw, sila, ang lahat na'y pawa
namang gumigiliw at nagsisihanġa.

Kay *Francisco Dizon* dapat kilalanin
ang pagkakatatag nġ napakagiting
na Samahang yaong may tanging layunin:
siya ang pumukaw, siya ang gumising
sa nangatatutulog na mga damdamin
na nangalalangġ sa pagkakahimbing.

Angel de los Reyes: iyan ang pamagat
ng kanyang pangulo nang ito'y matanyag;
Rosendo S. Cruz; isa ring masikap;
Yaman na ang Bayan sa gitna ng gubat
ay hindi nagtamo ng magandang palad
kung kaya nangyaring yao'y itinatag.

Hindi ba't ang taong likha ni Bathala
ay taglay sa kanyang pagsipot sa lupa
ang mga Tuntuni't Batas ng Paglaya?
Kung ito'y totoo; ġbakit lumuluha
tayong naririto? Pangarap nġa yata
lamang ang umasa't maghintay sa wala.

Hindi lamang yoon para sa lalaki
kung hindi laan din sa mga babai:
naron si *Pascuala Pintor* na may iwing
nġiti na ang bawa't nġiti ay pagkasi;
naron si *Conchita*; at isa pang saksi,
si *Anitang* laging dinidilidili.

Nangagsapisapi ang mga binata,
ang kadalagaha'y humalo sa haka
na ang Langit nati'y itanghal, ipala,
sapagka't ang ating darakilang nasa'y
ibaġgon ang bayan nating lumuluha't
humarap sa lalong malakas sa lupa.

Oo nga at tunay na dito'y nagkalat
ang mga Samaha't Kapisanang tanyag
subali't tulutang aking maisaad
na ang KAMI NAMAN Samahang mahirap,
sa matuling agos ng luha ng palad,
ay ito ang siyang darampi, huhugas.

RAMON S. TORRES

Taga "Ilog-Beata".

Tundo, Maynila, K. P.

Sa likod ng mga papuring ito sa
"Kami Naman" ay mayroon namang
mga naiinis sa di maalamang sanhi.
Aywan kung anong suliranin ang nag-
bubuyo at ang mga ito ay nagpapakaimbi
sa pagwawasak ng Samahan. Kinaka-
laban ang sariling damdamin, niyuyu-
rakan ang sariling dangal, at binubulag
ang sariling paningin. Hindi pa man
ipinanganganak ang "Kami Naman" ay
binanta ng lasunin. Sa kanila ang lahat
ng kilos ng "Kami Namsn" ay pawang
hindi matwid. Salamat sa pusong ma-
timpi ng Pangulong De los Reyes at
di man siya natukso. Salamat din sa
kalamigang loob ng mga kasapi at di
man sila nabalino. Talagang gayon: ang
tao habang natatanyag ay lalong duma-
dami ang kaaway. At ang Samahan upang
mabuhay kung minsa'y dapat magkaroon
ng mga kalaban.

Kung paanong sa kasaysayan ng Pi-
lipinas ay may isang *siglo oscuro* o isang
daang taong madilim, ang "Kami Naman"



G. Sofronio G. Calderon

Guro ng Wikang Tagalog sa Young
Men's Christian Association at
isa sa mga humahanga
sa "Kami Naman"

ay nagkaroon din. Dahil sa katapanġan nġ isang kalulwa at dahil sa pagkatupad nġ wikang ang pagtitiwala'y nakamamatay, ay nagkaroon nġ isang maalingaw-
 ngaw na usapin ang mġa nagtataguyod nġ Samahan. Dapat malamang ang usapin ay sa ilang tao lamang at di nġ boong Samahan. Ang Pangulo at ang Inġatyaman ay kapuwa inupasalaang umano'y mġa magnanakaw. Hinubaran nġ puri at tinanghal na mġa magdaraya. Hindi na kinilala ang pagkatao nġ mġa nagbintang at pinagbibintangan. Hindi na siniyasat ang kasaysayan nġ isa't isa. iKay taas na ganting pala sa nagpapakamatay sa pagtataguyod nġ isang Samahan! Sa gayo'y umawit nġ tagumpay ang mġa sumasamantala sa sigalot. Ang pagkatagpo nila nġ babaing lumabag sa kanyang kahinhinan ay siyang nagpatibay sa paguusig na ito. Nġuni't sa pitak nġ mġa pahayagan ay tahasang inilahad ni G. De los Reyes, ang boong nangyari. At sa likod nġ sigalot na ito ang mġa umusig din ang nagpapahayag na batid nilang walang salaping nawawala. Ano pa't paghihiganti o pagkainis lamang ang kanilang ginawa. Matapat na awa ang dapat iyukol sa namamatay sa pagtupad sa kanyang pananalig.....

Ipalagay nġ ang Pangulong De los Reyes at ang Inġatyamang Malonzo, ay nagkasala; bulagin na natin ang ating dangal at bingġihin na natin ang ating

damdamin; aminin n̄g sila'y nagkamali: ano n̄gayon? ¿Anong kapinsalaan may-roon sa Samahan? ¿Ang G. De los Reyes ba at ang G. Malonzo ang "Kami Naman"? ¿Sila bang dalawa ang bumubuo n̄g Samahan? ¡Hindi! ¡Hindi! At ang sumamba sa gayon ay walang pag-sampataya sa kanyang dangal....

Upang pabulaanan pa ang kumalat na balita, na ang "Kami Naman" ay naligalig, ay na ito naman ang bahagi n̄g ilang salaysay ni G. De los Reyes:

".... Sa isang Samahang na walang tumitiwalag ni ititiwalag na kaanib, ang Samahang iyan ay buo, matatag, at buhay. Iyan ay pinaghaharian ng kapayapaan at sapupo ng lalong matamis, dalisay, at matimyas na pagkakapatiran...."

Palibhasa'y lubos ang pagtitiwala n̄g m̄ga kaanib sa "Kami Naman" sa kanilang Pangulo at In̄gatyaman ang Samahan ay di mang naligalig sa sigalot na nangyari sa m̄ga nagtataguyod n̄g Samahan. Bagkus lalong nagibayo ang sikap at sigla. At upang lalong mapayos ang Damayan ay itinigil n̄g may dalawang buwan. Ang Damayan lamang ang itinigil dahil sa pagbibitiw n̄g tungkulin ni G. De los Reyes. Pagkatapos ayusin ay naghahalili n̄g Pamahalaan n̄g Samahan. Ano pa't malaking kabulaanan ang ipinamamansag n̄g iba na nalansag na raw ang "Kami Naman". Hindi, hindi nalalansag. Hayan at kumilos n̄g boong



Bb. Fausta Cortes

Pangulo ng Lupon ng mga Manunulat
at siyang kumatha ng "Agawan ng
Dangal" na ikatlong aklat ng
Aklatan ng "Kami Naman"

sigla at boong ningning. Gaya rin ng dati ay nakatayo pa ang kanyang mga haligi.

Sa kabantugan ng "Kami Naman" ay malaki ang naitutulon ng Lupon ng mga Manunulat. Nagbukas ito ng isang aklatan sa kapakinabangan ng lahat. Kasapi at hindi sa "Kami Naman" ay binibigyan ng laya. Doon ay sarisaring pahayagan at iba't ibang aklat ang nag-aantabay sa kahi't kanino.

Bukod sa pagsisikap ng Lupon ng mga Manunulat ng "Kami Naman" na makapagpalabas ng mga akda, ay nag-uukol din ng panahon sa paglilinang ng wikang tagalog. Ang katotohana'y napalaban na sila sa tanyag na *Aklatang Barusog*. Ang mga taga "Kami Naman" ay ayaw gumalang sa pagpatay ng N sa piling ng G. Ano pa't hindi sila kaayon sa *modang* ang ANG ay isulat ng AG (pinatay ang N). Ang mga taga *Aklatang Barusog* ay nagtanggol naman sa kabilang panig.

Sa mga ikinilos na ito ng Lupon ng mga Manunulat ng "Kami Naman" ay kinilala ni G. Sofronio G. Calderon ang kanilang pagsusumakit. At na ito ang isa niyang lathala na tumutukoy sa:

KAPAKANAN NG WIKANG TAGALOG

Ito ngang wikang Tagalog, itong wika nina Solima't Lakandula, nila Balagtas at Pilapil, nila Rizal na ngayo'y kasalukuyang pinagmamasa-

kitan ng *Aklutang KAMI-NAMAN*, ay hindi lihim, at sa katunayan ay nariyan ang lagda ng mga bantog na mananalaysay na kumilalang kasakdalan ng wikang ito, palibhasa'y ang wikang Tagalog ay isang wikang may sariling likas, may sariling ganda, may sariling yaman at isang wikang maipagbabadiya ng tanang saloobin at damdaming sumasapuso't isip ng tao; anopa't sa katagang sabi, itong wikang Tagalog na ating kinamulatan, nilakban at pinaka kaluluwa ng ating bayan ay may dakilang kapakanan ayon sa pagkakaakma't pagkakabalangkas sa isang paraang tumpak at kagilagilalas.

SOFRONIO G. CALDERÓN.

Dahil sa talino ng isa sa mga "Bituin" ng "Kami Naman" ang Lupon ng mga Manunulat ay nagkamit ng karangalang sa "Kami Naman" nanggaling ang ikatlo sa mga babaing pilipina na kumatha ng kasaysayan. Iyan ay si Bb. Pascuala Pintor na sumulat ng nobelang "Tagumpay ng Api", na siyang unang aklat na pinalabas ng Lupon ng mga Manunulat. Kung ano ang "Tagumpay ng Api"? ang isang liham ni G. Aurelio Tolentino ang dapat sumagot:

"BB. PASCUALA PINTOR.

"Mahal na binibini:

"Tinanggap ko po at pinasasalamatan ang mahalagang handog ninyo sa akin, isang salin ng inyong matalinong nobelang "Tagumpay ng Api".

"Kulang ang lahat ng papuring kaya kong sabihin, upang tumbasan ang hiwagang sarap ng aklat na nabanggit. Bukod sa talagang may

kalugodlugod na ganda sa pagkakahanay ng mga salitang bihis ng kanyang mayayamang isipan. ay naghahandog pa sa damdamin ng ulirang buhay na gaya ng kay Teban, aralan gaya ng kay Titay at katarungang gaya ng kay Mameng at kay Leon.

"Palibhasa'y marami na ang mga nobelang Tagalog; dahil sa mga mahahalaga rin naman ay maitutulad sa isang kuwintas na gintong sinasagisag ng bagong buhay. Ang "Tagumpay ng Api", ngayong mapakituhog sa kuwintas na iyan, ay naging pinakamaluningning na «relicariong» tinampakan ng makikinang na batong diamante, at may mahal na laman sa loob, ang buhay na larawan ng kabaitang nagtagumpay sa dagok ng kapaslangang binigti ng katarungan ng sariling damdamin.

"Naghihintay pagutusan ang talisuyo nilang si

"AURELIO TOLENTINO.

"Maynila, ika 30 ng Junio ng 1914."

Sumunod na pinalabas ng mga manunulat ng "Kami Naman" ang aklat ni G. Rosendo S. Cruz. "Tuntunin ng Pulong" ang pamagat at gaya rin ng "Tagumpay ng Api" ay nagtamo ng mga bati at papuri. Isa na rito ang kalatas ng isang taga Malabon, Rizal, na si G. Amado Jacinto. Aniya'y

"Malabon, Rizal, S. P.

"Ika 30 ng Okt., 1914.

"G. Rosendo S. Cruz.

"Mahal na kaibigan: Tinanggap ko ang isang salin ng iyong mahalaga at munting aklat na ang pamagat ay "Tuntunin ng Pulong", at ako'y nagpapasalamat ng marami.

"Rosendo, ang iyong aklat, sa ganang sarili ko, ay dapat mong ipagkapuri. ¿At bakit? Sapag-

ka't sa aklat mong itong maliit at mura lamang iay mayroon kang isang dakilang bagay na matuturo. At ito'y ang pagpapakilala mo sa iba, na ang kahalagahan ng isang katha'y wala sa kapal at sa laki, kundi nasa *wri* at saka sa *layon*: *uring* siyang bilang pinakapagaari ng isang aklat, at *layon* namang siyang tunay na ari-ariang kinapapalamnan ng daingal ng isang kumatha.

"Ang *uring* tinutukoy ko rito ngayon ay hindi ang tungkol sa kalinisan o karumham ng *literatura*, kundi ang kung *nakapagtuturo* o *hindi nakapagtuturo*; at ang sa *layon* nama'y kung *mabuti* o *hindi*, samakatuwid ay kung ang *pakinabuñgan* o makinabang lamang.

"Kapag ang isang aklat nga'y may *uring* *nakapagtuturo* at may mabuting *layon*, para sa akin ay sukat na, upang kalugdan kong basahin at hanggang sa purihin pa pati ng kumatha.

"At lalo pa marahil, kung ang kumathang iya'y isang kaibigang katulad mo! ¿Hindi ba?

"Tungkol sa pagbabasa ng mga aklat ay aking maipagtatapat sa iyong ako nga'y mayroon ng kakaibang panglasa kay sa dati, at ang sabi ko'y ganito, sapagka't hindi na ako nalulugod ngayon sa mga Felipe Trigo at Eduardo Zamacois, diyan sa mga mapaglarawan at mapaglikha ng mga kuwadrang nakapagpapagalaw ng laman at nakapagpapakalam ng balat, na sa mahinang loob ay sapat makapagdulot ng isag masidhing pagkakiliti; kundi doon na unti-unting nawiwili ang aking loob sa mga Heberto Spencer at Samanuel Smiles, sa mga Noé Porter at Tomas Stanley.

"At dahil sa ganitong pagbabago ng aking hilig, ay huwag ilalaki ng iyong loob na ipalagay at sabihing kong ang aklat mo'y lalo pang kapuri-puri kay sa di iisa't dadalawang naghahalaga riyan ng 40 at 50 *sentimos*, sa pagka't ang iyo'y nakatutulong sapagtitipid ng panahon ng mga samahan kung sila'y may pinagpupuluñgan, samantalang ang mga yao'y pa-

wang mga *awit* ding mistula ng nakalipas na panahon natin, iba nga lamang ang *pañgalan*, *anyo* at *bihis*; dapuwa'y sing-isa ring walang nagagawa kundi ang magparami ng mga pañghahas, pilyo, at palalo.

"Iyan ang mga sanhi, kung kaya't бага man may kulang at di mo binuó ang "Tuntunin ng Pulong" na iyong sinulat, ay hinahandugan ding kita ng isang maligayang bati, na kasabay ng pakikikamay ko'y tanggapin mo rito sa tapat, at, natatalaga mong kaibigan.

(May lagda.) "AMADO JACINTO."

Ang ikatlong aklat na ipinalimbag ay ang "Agawan ng Dangal" na akda naman ni Bb. Fausta Cortes. Ang nagpanukala't nagtatag ng mga balitang "Ilaw at Panitik", "Aklatang Barusog" (mga Samahan ng mga manunulat na tagalog) at "Hijos del Siglo" na si G. Honorato H. de Lara ay siyang nagpakilala sa madla kung ano ang "Agawan ng Dangal".

Isang *liga* ng *indoor base ball* ang itinanyag naman ng Lupon sa Pagpapalakas. Ang *bituing* Concepcion Magallanes ay siyang naghagis ng unang pukol ng bola. Limang *team* ang lumaro at ito'y ang "Marte", "Katubusan", "Sinag Kapuluan", "Makabayan", at "Kami Naman". Ang "Marte" ang nagtamo ng tangging gantimpala.

Ang Lupon ng mga Bituin ay kalabisan ng sabihin pa kung ano ang nagawa at ginagawa. Sukat ang ipagtapat na utang sa mga "bituing" ito, ang lahat ng ikinilos ng "Kami Naman".

Paano'y sila ang buhay at kaluluwa ng Samahan.

Patuloy sa magiliw na pagdadamayán ang Lupon sa Damayan.

Ngunit ng Lupon sa Kalakal ay napa-himbing. Ang Lupon na ito lamang ang nagmintis. Gayon ma'y nakapagtayo rin ng tindahan noong Febrero ng 1913, baga man nabuhay ng may anim na buwan lamang.

Sa mga kasiglahang ito ng mga lupon ng "Kami Naman" ang Samahan ay palaging nakapagwawasiwas ng watawat ng tagumpay sa lahat ng kanyang balak. At man sa tuwing bago siyang panukala, ang mga pahayagan ay nangagsabing «Bagong maningning na dahon na naman ang mapaparagdag sa hinahangaang kasaysayan ng "Kami Naman".»

At dapat namang dakilain ang "Kami Naman", palibhasa'y isang samahang nakikipagkapatiran sa lahat, sampu sa mga nagpapakaimbi sa pagpatay sa kanya. Kung totoo mang may mga kamaliang nagawa ay totoo rin namang lalong marami ang tumpak na pinangatawanan.

Diyan natapos ang dalawang taong pamamahala ni G. Angel de los Reyes na nagwagi sa tatlong halalang sunod-sunod sa pagka Pangulo ng Samahan.

iiiPanahon ang humatol sa magiging kapalaran ng mga samahang katulad ng "Kami Naman"!!!

HANGGA

"CARPIO'S STUDIO"

614 Azcarraga,
Tundo
Maynila, K. P.

MANUNUKLAY NA WALANG BAYAD

Kumukuha ng larawan sa lahat ng araw, maging sa loob at labas ng gawaang ito, no sunod sa mga kahilingan ng bagong panahon.

May mga sadyang gamit sa ano mang kailanganin ng mga taga tangkilik. Sadyain at ng mapatunayan.

MARCELO CARPIO, May-ari.

"MODERADO ORIENTE"



SASTRERIA GENUINAMENTE FILIPINA

Calle Sacristia No. 247, Binondo, Manila, I. F.

Cortador experto y de mucha experiencia corte a la última moda de París y América, combinamos al gusto de nuestros parroquianos.

Sastres diligentes y prácticos en todos los trabajos concernientes al ramo, novedades en Sedas, Lanas, Alpacas, etc., a precios muy económicos.

Compatriotas: Venid a ver nuestro establecimiento y os convencereis.


NORBERTO TUASON, Cortador.

Carlos Dionisio

SASTRE

Juan Luna No. 964

Tundo, Maynila, K. P.



GABINETE DE OPTICA
DE

Carlos Ortes

OPTICO OIENTIFICO

Manggagawa ng salamin sa mata. Sinusuri ang mga mata ng walang bayad, at may mga sanay na optico sa lalawigan.

Escolta Blg. 24, Maynila

Itaas ng Extremeña

SASTRERIA Y CAMISERIA
"KATAKA-TAKA"

DE

Pascual Chacon

Azcárraga No. 620

Binondo, Manila

SINE DIMAS-ALANG


DAANG TEJERON, SANTA ANA, MAYNILA

Sa mga sandaling tayo ay nalulungkot ay wala ng nararapat pagliwaliwan gaya ng bantog na SINE DIMAS-ALANG na ari ng mga pilipino. Doon ay pawang pili at mahahalagang pelikula ang itinatanghal. Ano pa't di lamang makapaglilibang kundi may katutuhan pa. Magagandang binibini at makikisig na binata ang karamihan ng dumadayo doon; ito ay nagbabansag ng kabutihan ng mga napapanood.

CINE DIMAS-ALANG

DAANG TEJERON, SANTA ANA, MAYNILA

OPTICA NACIONAL




C. LARA Y CA.

OPTICOS CIENTIFICOS

40 Rosario—Pagliko ng Plaza Moraga,
Binundok, sa itaas.—Tel. 4087.

Kung nais ninyong gumamit ng mahusay na salamin sa mata ay sadyain ninyo ang OPTIKANG ito, at dito'y bukod sa sinusuring mabuti ang mata sa pamamagitan ng tangging karunungan ay husto pa sa lahat ng kagamitan, kaya dito'y hindi kayo dapat mag-alinlangan, maigagawa kayo ng bawat inyong maibigan sa halagang inyong kaya, at maaaring kumpunihing muli ng walang bayad sa anoman ang ibig ninyong ipabago. Pagsadyain upang mawala.



471 J. Luna,
Binundok,
Maynila

Limbagang "BANAHAW"

Telefono
Blg. 8171
P. O. Box...

—¡Oy! chico, bakit ba't tila ka bugnot?

—¡Naku kaibigan! Madaluma't mo ba namang ang bawa't bumili ng aking nobela'y isinsole, gayong ito pa naman ang siyang nagtamo ng unang ganting pala sa Samaháng "Kami Naman". At sampu nitong aking *tarhetang* ipinadala sa aking nobia ay ipasauli pa.

—Siya nga ba? Bakit naman nagkagayon?

—Paano'y, tignan mo nga—at binuklat ang aklat na hawak—tanġi sa matang kalabaw ang mga letra ay malalabo pa at paekisekis; at ito namang aking *tarheta* ay tanġi sa alangán ang laki ay marumi pa ¡Naku! Kaibigan, ibig ko ng sindihan ang ganyang limbagan na ibig kumita ng salapi ay ayaw maggasta.

—Bueno tuturuan kita. Kung magpalimbag ka uliuli ay sa *Imprenta BANAHAW* na nasa Juan Luna, Binundok, na tanġi sa mga bago ang tipo, ay talagang di binabayaang lumabas sa kanyang pintuan ang gawang marumi; doon tanġi sa mura ay malinis, at maipagmamalaki mo.

SADYAIN AT SUBUKIN

UNIVERSITY OF MICHIGAN



3 9015 05149 7439

COPIES

Ajawan ng Dangal

1919